

中冷詩舫



温州市图书馆

75.44
索书号码 4414

登记号码 09877

共1册

中冷诗钞 八册

共 1 册 存 1 册 排架号

庚戌之歲識蒞漁於吳門日以講說聲韻爲樂名志相好
情誼彌竺則嘗讀其所作詩歌每有謝靈運江左莫逮之
歎蒞漁蓋博聞多識等智第一人也壬癸之間一渡東海
兩遊京師率與蒞漁相偕而和韻聯句之作亦夥譬之蹴
鞠蒞漁香象予跛驢耳其相去不可度以丈尺蒞漁稔予
愛好其詩自後有所作必郵示予予亦以是得盡覩其秘
私謂知蒞漁詩者莫予若也蒞漁天才穎拔不斤斤祖述
風騷規撫唐宋獨申胸臆自啓天機豎義則草腐人天鍼
投鉢也結句則疑有疑無藤倚樹也遣字則體色相融水
入波也選韻則聲節宛轉鈴縣塔也以古人之詩况之蓋
無一相類似者是或不免爲泥古者訾議予恐蒞漁畏人

嘗議不能自持或變異其體致以諧俗因促其董理新舊所作如小璣袖海石城前後燕塵吳山從漚舒州諸集付印行世以堅其意世豈無愛好菘漁之詩如予者乎西方先達云一切法離言說相離名字相吾爲菘漁詩說法菘漁幸勿比予於豐干而申申詈予也民國四年乙卯二月當塗奚侗

菘漁先生示所爲詩曰小璣者一卷曰燕塵曰吳山曰舒州曰石城前後各一卷曰袖海曰從漚各一卷觀其結思芊眠摘華瑰逸足使梅村變色定庵失步謨觴瓶水鮮或儷之若夫緝遐紘域洗聞代禩則通天含元不足程其麗呵壁談瀛無以喻其奢斯則書成百三紬以金匱文成數萬資之寶書固才之贍哉蓋亦天所假矣夫聖述三史詩居其次而後興衰之由究焉皆得命革午亥政革卯酉五際四始徵乎絳緯故知詩也者辭婉於春秋事覈於尙書體不相謀而職無或異茲足尙也唐代之言詩惟浣花一集號稱詩史惜其智韜萬彙而事局寰中登岷峨而聞禮林窺衡湘而迷春竹境所不呈思且莫致明而未融是之

故乎今先生丁改革之會際棣通之世運合乎酉亥跡拓
乎仁羿望瑤臺而縹閩風亦所以推愛見事也夫質文崇
替今乃勝昔晚有廖氏說經經經旁羅鞮譯下該百世可
謂振古之奇作矣然理涉憑虛事匪徵實國門千金俟諸
來者以視先生之理侈辭溢而功歸核鍊優絀之數殆難
矯異若乃施于有政周愛四國鬱乎召郇之美僑札之風
則又明詩者流所當馴致茲猶息壤爾含山張學寬

天下盡人有詩境焉然有境而苦不能狀情不深也能狀
矣而或不能盡境之量以赴之才不大也晚近以來得境
較苦者務爲枯瘠之語發爲蹇澀之音亂頭粗服以爲天
趣獨得持之爲宗派識者早病其情韻寡寂而才之脆且
薄者顧樂得而就之抑或矯癯而爲肥避斂而爲縱則又
淫哇穢語搖筆滿紙聞者方掩耳走作者猶自負真才子
之歎詡爲樂境噫卽云才亦甚恂且俗矣而烏知其爲情
之賊也今有一身遇天地無窮之詩境而又能具古今詩
人之才之情窮形以狀之罄力以赴之舉所謂晚近詩家
流弊兩皆無所於犯求之海內詩交豈易數數觀哉夫詩
境天生者也詩才詩情亦天生者也使有一境旣爲情之

所宣必以爲猶非才之所洩不惜雕之選之粉之飾之而
其人之情恐將日遠乎溫柔敦厚之教而其詩亦將日失
其纏綿悱惻之誠竹垞貪多漁洋愛好雖云責備賢者要
不得謂非談言之微中而蒙因有感焉古之詩人其所謂
世間萬事貴天生者蓋使其情常不受才累而情之爲地
獨真任才之騰天躍淵而無弗歸吾控制是才不敢奪情
以爲政而筆墨與境俱化無或稍逞其奇巧以擾亂其天
籟之音而中傷乎元氣善哉吾師海陵黃先生之說詩曰
詩動乎天而應以人天人之相應也今之詩猶古之詩也
天人之不相應也意匠經營之日深也興觀羣怨之日遠
也斯言也殆卽天生之說也歟曩讀我友菘漁之詩而有

見焉今持爲菘漁廣之菘漁不以予言爲迂詩境無窮將
自今善養其詩情而不一聽詩才之命其詩必更有超出
乎晚近詩家上者遂以書其集云乙卯嘉平同里吳清庠

中洽詩鈔甲編

小璣集

東阿望丹徒

丹徒葉玉森莊漁



寄奴遺宅莽榛蕪誰復南朝憶霸圖何處荻洲龍虎氣寒
鴉數點落丹徒

焦東暮歸

水村十六山村四畫裏人家擬十洲竿扇清溪兒喚鴨笠
蓑平野女牽牛乳萍數點綠沈脚兜柳一團青蓋頭惜取
春郊好煙景歸鞭緩緩夕陽收

遊招隱寺訪虎跑鹿跑二泉

雨氣魂魂澀秋綠鬼蒿蛇藤纏斷竹帝子不來杜鵑哭磴

煙滑屐落鬢髯虎跑鹿跑枯魚鼃石龍不噴珠無花

山塘放舟至虎阜口號 三首

七里山塘一葉舟碧鱗鱗水膩如油山塘不似秦淮瘦綠
鬢紅簫畫舫頭

斟酌橋邊水清淺水清水淺愁儂心請君斟酌復斟酌儂
汝情波若箇深

玉匣珠襦冷殯宮沈沈虎氣野蒿中闔閭魂嘯奈燈綠照
見魚腸一尺紅

戒幢寺觀鼃歌

咄爾鼃胡爲乎來非龍非能而爲鱗介菑鯨吞淨土水聚
族聲喧趺蹠跚穹脊萬千數蠢如磐石微如杯戒幢寺池

水黝黑腥風刺鼻日無色昂然立首掀出波黃母釵痕金
髻髻我聞爾雅翼謂爾靈龜胎又聞加恩簿贊爾調鼎才
豬婆癩頭亦孔醜燃犀酈子思潛雷吁嗟乎醉舌公河伯
使老僧喃喃話鼃史仰天大呼古冶子

閻典史祠觀祭

閻典史莽男子提刀躍馬大呼市殺賊江邊三發矢鼎湖
龍鳥號弓小臣泣血砂山紅芙蓉城外哀援鶴芙蓉城中
羅鼠雀斯時典史飛入城芙蓉滿城開鐵萼二十四萬龍
蛇屯八十一日雞蟲爭五更樂府轉不得睢陽死節尤錚
錚峨峨者祠馨香式儀神之來騎赤鬣神之歸啼紫鵝芙
蓉城頭鬼燈碧燭髑模糊拜明月

亞東新樂府 四章

棄婦辭 諷中立也

雪嶺如妾膚綠江如妾鬢與君結伉儷雙笑燕支山燕支
山色暮君心遽忘故一歌棄婦辭踟躕立中路中路君忍
捐賤妾請一言兒女疇君扶門戶疇君鍵請君看明月月
缺何如圓請君鑒流水水逝不復旋東家妖冶郎誘妾櫻
花囊西家遊俠子要妾青龍尾妾身何足惜君情不忍釋
踟躕重踟躕願化山頭石

鶯兒飛 憂戰禍也

鶯兒鶯兒天上飛日中有赤鳥天上何輝輝鶯兒仰天作
狂舞振喙啄天天不語日鳥不能平含燧燎鶯翎燭龍佐

厥燄大起崦嵫軍鶯兒咄咄呼鶯山羽翼排天衢藍摩詩
史績奇景麒麟角鬪今何如盤旋搏擊煙雲變腥風血雨
天門戰鶯兒終奈日烏何天眼朦朧光一線

廣寒宮 感土木也

天魔十八騎飛龍修羅慘劫鑿罡風酒旗星裂河鼓死姮
娥雙耳裝天聾於時廣寒宮內大集會雷斤月斧膚神工
娑羅截梁桂削棟琉璃瓦疊銀青虹由旬十六矗雲表瓊
樓玉宇何玲瓏仙人宋無忌才人王仲宣拜手頌落成鳳
藻爭翩翩牽牛一星隔碧水十萬天錢償未已姮娥聞亦
負天逋自築謬臺月明裏

鶴鶉飛 刺權閹也

鷓鴣飛飛入瑤池裏牙牌錦袋金絲籠充作西王青鳥使
初磨田鼠牙漸舞蝦蟆爪殘如大背烏慧如秦吉了鴉毀
室兮鸚鵡巢鷓鴣之犇犇沿爲謠鳳皇吞聲女鸞哭白唐大
笑秋風驕流離那識西王苦朝朝暮暮燕支部絨花毯上
鬪妖嬈天香歌罷山香舞瑤池清矣西王歸西王歸矣天
網恢天網恢鷓鴣飛

與孫大薛衣遊野塘

小石欄橋俯野塘科頭雙影立斜陽新萍綠聚客心定稚
柳青疎人樣長鴨喙掀泥尋水蚓牛腰摩樹拂田蟲忘機
自得逍遙樂濠上何如惠與莊

山中

十丈紅塵飛不到山中宜雨更宜晴小沙界白平如水密
樹圍青拱若城雙蝶倦尋芳草夢一鶯默聽落花聲考槃
誦罷吾方少出世難忘入世情

次韻答姜胎石

酒魄詩魂消瘦絕那堪與子更言愁一春咄咄呼奇雨大
陸沈沈泣漏舟市客儘多沾撲滿海人無復貢扶留江潭
舊夢今何似三兩桃花四五鷗

楓橋曉霧

楓橋夢破曉鐘時倦起推篷萬象疑霧鬢風鬢靈髻髯吳
山一箇一西施

春申君墓

以呂易嬴日奇哉
平又黃君山一坏
土楚國廿年王
禕布未知異棘門
終自戕千秋此怨
魄春草不成芳

中洽詩鈔乙編

袖海集

溫則宮詞

丹徒葉玉森蒞漁

溫則宮者英前女皇維多利亞之寢宮
女皇夫死乃範象於中築墓其側
玄裳終身用志永悼亦西史之豔蹟也
爲賦此詞

華鬢紫鳳鳴鏘鏘瀛洲淚
史哀娥皇摩挲銅狄落秋雨
溫則宮中春恨長恨長恨短
春潮咽鴿嬌鶯麗承歡日不似
夷光孕苧村本來弄玉生椒室
烏號弓慘鼎湖龍無那雌
風警化雄高卷珠簾人似玉
天孫星煥紫微宮九環鳳履
輝龍動即倫加冕儀成寰宇頌
聖油漿灑雪花裳神御鑾

飛金甲鞞九環履聖油均女皇加冕時上壽瑤宮二十齡
翩翩翠雀舞雲屏冰膚春皎來姑射銀漢秋涼渡婿星薩
哥侯嗣瓊枝麗紅絲一縷新羅施笙簫迎入女英家夜合
花開歌吉利行宮從此關情天錦壁牙船象萬千白石瓊
瓏環素女瑤樓宛轉集金仙宸遊時奏雙飛曲笑飲蒲萄
紅百斛水精樓閣夜光多金粉江山春睡足彈指雲煙廿
二年銀婚明月不曾圓西俗以結婚滿二那堪冠上黃楊
葉化作碑前白柰圈懊儂聲裏孀鸞哭杜鵑三島哀音續
鬢絲揉枕綠雲蓬淚帕兜珠紅海浴銷夏分明記那廂鮫
綃攜手立風廊玉杯分飲檸檬水翠瓊同斟薄荷漿鰈鰈
鵝鵝朝共暮仙山縹緲歸何處遺影空留玉樹風芳心苦

浥紅菴露祗是難銷永別魂疆模石象寢宮門金人髣髴
阿房異鐵佛依稀印度尊相思豆子迦陵鳥從此娥皇歡
樂少舞衫罷演拍稊歌拍稊英京名女伶梵偈時爲基督禱宮中
盛事越尋常玉葉金枝繞御旁椒寢佳兒青雀子簫樓快
婿谷蠡王眼底心頭無一可白紗永永纏螭首立衣竟夕
裏癡愁金盒終年拋素肘精衛難填恨海波媧皇爭奈漏
天何秋墳寂寂寧馨鬼春夢沈沈未醒婆殯宮紅葉鄰溫
則圓屋琉璃櫛文石粉壁還摹十字圖佳城蚤卜雙棲宅
海紅花落草初齊正是英倫上塚時銀盃勃蘭鸚母泣蒿
鐙燐火鳳雛啼娥皇自是多情種娥皇英武天驕寵雲輦
時巡八駿馳旭旗溥照羣龍捧未聞同室戰紅薇幾見文

梁茁紫芝天竺愛蘭雙鑽冕歐風墨雨一薦支六十二年
皇御宇馬麗魂驚伊麗舞前無千古後千秋白髮垂簾猶
虎虎一朝蕉萃碧犀牀海上曾無續命方湘竹啼殘尋帝
子巫雲飛去戀襄王哀聲流入滄溟外嗚咽魚龍齊奏薤
穹碑紀念蟹行文寢殿招魂螺誦唄慘慘離宮夕照斜鴛
鴦雙笑鬼鑿車春風春月年年好爭唱維多利亞花

大食故宮詞

紀畏廬譯華盛頓歐文大食故宮餘載事

六朝金粉南朝淚眼中無數傷心地去讀西方吉利書依
然東土興亡記唐時大食古天方割得崑崙一曲腸努海
神平洪水劫奈山靈繞阿丹疆默伽城外明星出穆聖飛

魔稱第一雷霆卅卷可蘭經龍虎三洲天使蹕嗣王從此

席英風歌舞河山卓木雄

卓木即聖
奇之義

冰雪琳琅清暑殿檀

欒金碧廣寒宮阿蘭便是伊倫谷建章萬戶蜂房曲絳塔
春煙蕩珮環紅泉秋月飛珠玉石家姊妹並承恩寶鬢華
鬢鬪黛痕千夜新談娛帝子六時春色醉王孫金釭四角
嵌鷗尾秘殿華清涵禍水龍涎十斛洗天花牛渚一彎嬉
月姊宮車暮暮復朝朝鸚鵡誰知夢裏謠埃及蠻王輸睡
草波斯估舶貢鮫綃狂飈一夕掀龍府鸞飄鳳泊悲無主
揮淚峰前欲斷魂伏流臺上曾何語遜國倉皇逐亂鴉那
堪回首夕陽斜雪山東去無顏色紅海西來有血華竹枝
淒絕銅甌陌半月旗殘年七白金樽檀板又誰家玉宇瓊

樓空故國故國荒涼况故宮宮花寂寞可憐紅夜鶯春老
啼蠻雨野蝶昏黃撲鬼風錦衣鐵屐虬髯客萬里不歌行
不得已隨胡馬度龍沙更趁明馳雁磧翩翩來作赤哥
王賸水殘山日月長禾黍分明亡國影玫瑰依舊美人妝
低回欲賦長門怨獨上層樓君不見月中舞袖女吹笙天
半垂竿人釣燕何處冠裳集外臣那邊鬢髻立宮嬪黑奴
捧劍三千士素女司鐘十二辰香囊錦幔都烏有壞壁猙
獍魑魅首更無天子幸長楊空見將軍營細柳青燐一點
夜探幽寢殿森沈蝙蝠愁石上驚看哀碧血池干癡立怨
空侯白頭宮女蝸牛后丐王語罷招鱸叟情天有路訪孤
鴉鬼騎無頭隨七狗荒唐重爲話傾城星士神機勝甲兵

塔顛銅將占烽火地底琴娥奏夢聲鐙脣更述三公主蠟
蛸尙冑妝樓戶昨夜遊山跨白駒當年出谷奔脂虎長言
短語雜悲歡佳節難逢聖約翰娛我銅絃流水曲賜兒石
手太陽山宸遊已倦渾無事椒庭如水花如睡妄聽蒲阿
地闕談續成拏墨天房志天房即天方克爾懊惱鶻啼客
帝旋一般掩泣出宮年夢中金鑽仍神穴篋裏文章有淚
泉悲潮流徧瀛洲紙爭讀歐文斷腸史月明獅殿更無人
花落狐邱應見鬼風縐春波綠一池挑鐙辛苦寫哀詞都
將良嶽千秋怨譜入梅村七字詩

伊魯廸斯宮詞

土耳其皇哈美於一千九百零九年夏被廢徙

之沙羅尼克海上報紙記遜國時事及故宮風
景綦詳爰最之爲長歌

魚龍混戰西溟水二百年來翻恠史十字軍亡聖教微大
民會出人權起傀儡冠裳帝子家不容長劍拂歐花風雷
怒擊神鼉首鐵血爭鬪餓虎牙自絲鐘吼歡潮祝西方都
食共和福半月飄零突厥旗橐駝猶抱黃沙哭赫赫蘇丹
稱土皇一世雄高居伊魯廸斯宮鴻規秘殿崇羅馬大闢阿
房擬祖龍柏林盟後朝廷小偏安自愛斜陽好袖底金丸
斃俠兒獄中黑索攀冤鳥蜃樓如海倦臨朝四百宮花鬪
細腰天外使星徵粉黛雪南佳釀醉蒲萄拉土皇嗜加琴檠
窈窕騰蛇穴不似建章門戶闢白虹貫日殿鷹蒼懸膽君

王朝暮怯天子多愁未敢狂顰眉怕見內家妝抱衾逐夜

移龍榻銜壁通宵燕鳳缸鳳缸龍榻春冰地杯弓蛇影時

驚悸纔聞死黨瞰林鏗或美故總統名復報生王沽魯意故法

皇魯意無端鞞鼓震天來金角河頭角響哀蚤見鯨鯢墮

塔壘塔壘與守卒激戰地旋看貔虎踏天街少年進步軍如水

連理宮中囚斐禮困法故皇禮會爲民國黨團壁上諸侯袖

手觀羽林子弟投戈死爭似臺城七日圍佛郎狂吼彈花

飛儘教荷荷呼牛乳忍見哀哀縶鳳兒逼宮神勅傳宣促

黑衣狗監齊聲哭息壤空思曉露甘曉露甘生地遜位時一土皇誕

請神勅使願落花都怨春風毒檻車夜出太匆匆三十三

年一夢空難上九天參穆聖永流絕島誅孛翁新皇擁立

成兒戲翼戴奇勳爭不世憲章全削可蘭經學黨難乾孤
竹淚玉兒依舊戀東昏十一皇妃隨徒有喘鳳潛龍自閉門海
嶼零星歸遠鏡雪茄清苦佐芳樽此鄉足老公安樂一方
淨土三層閣御膳仍供多惱魚河多惱名謫居翻礙長生藥回
首荒涼憶故宮萬牲園冷亂蒿中蜘蛛殿角金絲網鸚鵡
闌干碧玉籠宮中殿角多以金絲網飾之鸚鵡亦以寶石
存宮中萬一彈指頃悲禾黍過客酸辛斷腸語鑽石終沽
亞智王哥法廢王亞黎智之鑽石等物黃衫莫問天方主廿紀
哀潮奈若何血花璀璨繡山河傳聞黑海天驕子猶唱金
眸帝鷲歌

新讀曲歌八首

愁難解開門見白山開眼見紅海
腰如許離愁不可束帶緩思更苦
月丁鈴道是慈悲聲爲底搖儂情教堂舉月丁鈴
懊儂歌郎居喜望峰妾居多惱河
儂心不能春自去探北極萬里見冰蠶情絲又如織
蒲冠簇繒花颺以鷺絲毛臨水忽見影蕩子心搖搖
贈儂鮫綃衣低頭不欲着持底拂歡情爲渠太輕薄
面網白如霧隱隱霧中花攜手大堤上妒煞知誰家

東渡紀行二首

一嶠九分圓帆從缺口穿唐人此關市蜚女已如仙樓閣
參差裏烟波澹冶邊蓬山吾可卽翻笑祖龍顛泊長崎

曉日啟神戶攜君掉臂遊此行僭鏡中雙禿髮溪上一低頭
蜃市聞腥氣雌瀧訪倒流神戶一雌一雄故人邀我醉鄉味在瀛洲同里夏雨農商於此是日邀飲

淺草朝日館觀印度女子跳舞

銀環串鼻花團羣翩翩袒臂垂紫雲素足蹴踏氈飛塵鈴聲搖曳雙蹀春咿咿啞啞賽神曲拍手回腰脚撲速亞身作字偃地花髻髻天魔嬉鬼谷頡黎蠻舌驕流鶯櫻奴憨笑知誰馨落紅無言佛無語舞榭隱隱聞軒聲

新吉原歌

新吉原乃日本東京之遊廓列屋羣居輔以警政大類齊女閭制偶得豔史一卷樓居無俚最

作長歌

瀛洲十萬燕脂匯柔鄉韻史繁華記賺我鋪箋寫淚花吉原新影分明續開國風流溯德川麴町金粉柳町煙鑄成色界千重却割得華鬢一角天後江戶妓樓始於德川開府衛門首建傾城市半岸荒涼橫碧水蒹葭霜露夢伊人楊柳鶯花迷蕩子元和三年甚右衛門奉詔於葺屋町地建傾城町其地本為葺沼乃

造廊築屋以居遊女名曰葺原後更易廓額纔聞換吉祥

三年本鄉本妙寺火延燒吉原從此添新字五十間衢移

吉原燬焉因有新吉原議吉原從此添新字五十間衢移

豔幟膩漲初流淨念河檀香遠引觀音寺巫峽透迤日本隄大隄金勒夕陽西衣紋坂上先偷眼茨木樓邊乍拂衣

新客過此地必舊為千束村自日本隄小樓至吉原有坂屋名衣遊
 遊引客長途不易 瑤宮隱隱幽蛾綠鳳鬟無復妝元祿散茶
 脫故為客長途不易 瑤宮隱隱幽蛾綠鳳鬟無復妝元祿散茶
 低喚女郎花對鏡巧梳兵庫曲女郎新吉原開元祿而為散茶
 女郎詩小雅子髮曲局後人加古影作警字詩韻人亦沿用古之
 作曲詩小雅子髮曲局後人加古影作警字詩韻人亦沿用古之
 初逢櫻又繫駒松羣展翩翩蛺蝶蟲茗屋多情呼引手瓜
 燈小樣指揚弓 櫻松二樹在均媒介遊客之所引手鳳帶鸞
 裳鶯出谷抱衾歸去攜嬌禿緬氳氳同斷襟蒲團宛轉
 雙飛褥多彼中呼侍女曰禿遊又日人呼衾曰同蒲團綠日相
 牽拜稻荷仙裾簇擁託微波白狐石畔搜神記黑助祠前
 戀子歌 每月午之日為緣日多往謁石荷有神二白狐形不止野
 和遊之狀頃有民謂祀助之者可居神社側物奉為石稻荷又天朝

朝暮暮儂和汝殘紅未解飄零苦看市囊星夜賣螢情棚
 拜月宵鳴鼠 兇客多偷拜緣起棚一名情棚以掌敲柱遊女
 鼠鳴謂可 太夫還愛荻江流酒倦鐙迴散萬愁羽織玄紋
 獲利市 太夫還愛荻江流酒倦鐙迴散萬愁羽織玄紋
 摹鬼舞杏鬢素口學蠻謳 吉原呼玄色大鼓之幫間藝吹妓口曰
 夫笛均作結髮為舞小銀杏形太鳥啼花笑迎明治維新時代銷金
 地菱鬢猶存安永風華筵更引流求妓錯采鏤金迴不同
 獅獅癡鳳錦屏風蜃噓樓閣三重幻蝶簇氈氈百疊紅東
 遊一度探魔窟秋街如水人如織三字玲瓏篆電芒十眉
 婀娜評春色 甬道牌樓上懸珠光燦然每家遊屋樓下多鈎
 懸各遊女之小影鐵闌干密踞羣仙看煞西施不索錢煙
 並題其名以誘客 鐵闌干密踞羣仙看煞西施不索錢煙
 草吹輪爭舌巧粉花熨紙上眉纖 遊女中時吹煙手作一輪煙形

鏡以爲戲又有面一小東人語我蓬萊好扁鵲探梅遺毒少
珍珠無奈寄生蟲翡翠終非同命鳥可憐春夢玉鉤斜蕭
寺年年哭落花莫話箕輪貓豕史薄雲千古怨琵琶東墳都
志下谷箕輪之淨閑寺爲新吉原遊女葬地薄雲乃吉原
名妓有貓癖其愛貓死葬之寺中曰貓豕都人每豔稱之
夢遊富嶽吟

君不聞秦皇癡夢神山三徐郎一去攜童男方壺圓嶠竟
何有空餘海客瀛洲譚又不聞惺窩詩史鑄奇語羅笠檐
中州十五忽現素羅笠羅笠檐中十五州富嶽之高高
插天呼吸居然通帝所笑予橐筆遊瑤京閉門日譯金璫
經交梨火棗啖已飽眼中不識蓬萊青昨宵醉誦遊仙句
忽入太郎坊口路手握金剛杖一莖金剛杖爲登直上嵯

峨最高處淺間山社櫻花祠脫巾笑謁櫻花姬淺間山祠

耶姬相傳芝幢翠葆擁仙珮飛瓊泥飲流霞卮當時涼月

清於水簾角依稀露鸞尾借我翩翹赤燕驂富嶽有赤燕

燕飛入蒼煙明滅裏月湖之月絲瀧絲芙蓉八朶峰靈奇

噴火古穴萬年雪奔騰百怪爭陸離冰輪漸沒雲瀾伏絲

海茫茫渾一白須臾足底失乾坤直道龍蛇真起陸東方

忽涌纖眉紅天雞紫鳳啼囉囉乍成金櫛倏瑤鏡扶桑日

出光瞳矐昂頭一萬三千尺歷落晨星疏可摘瓊樓玉宇

太高寒天上翻愁行不得翩然復墮人間世髣髴嶽雲纏

我臂太白曾歌天姥吟此夢平生吾亦未噫吁噦家山五

嶽空披圖崑崙刑馬何有乎安得趾離宜嶽爲我一一導

吾將朝朝暮暮遊華胥

上野公園

老櫻萬樹鬪天喬一角空青嵌佛寮日暮烏啼遊子淚花
時蝶倦女郎腰賣茶葉底紅氈榻月池心白石橋還謁
蕉翁遺冢去詩魂零落更誰招

自神田乘電車至品川易汽車至大森海岸探梅

於八景園復步至池上村大梅園偕汪味根陳
逸崎張星薇楊若盦

策電品川濱馭氣大森海初遊八景園梅花笑破蕾寒芳
深襲茅龍衣茶孃招手花之眉美人羣紫團香飛屐聲拖
雨兜花園孤山百樹未足鑿我意拂袖直欲辭花歸花邊

小兒女語我池上村行行不二里乃至大梅園翩翩萼綠
華嫋嫋采蘋妃牽裳握手立宛誦迎賓辭花姿婀娜因花
師婆婆藤蔓垂楊絲古苔脆玉繡老幹松鱗偃臥爭離奇
菲菲香霧目亦醉時見啾嘈翠鳥鳴高枝梅花一萬樹天
竺一萬株琪園瑤圃中蒔以紅珊瑚縞衣雪鬣隊曳之流
霞裾銀花火樹一時合笑說千秋無此奇麗梅林圖陳元
龍張季鷹楊鐵崖汪水雲花陰散坐花爲茵上垂瓔珞索
俯拾牟尼珠祇園一笑共成佛拈花迦葉吾非吾花房春
沸溫泉浴暗粉暎熨姑膚玉晶窗如水花關人縹緲仙山
幻太真東家子西家施拂花攜婿來參差螺鬢響屣落紅
亂蠻腰欹笠薰風癡酒家容得師雄夢曙樓天矯花天縫

花有西菜館蒲萄果釀萊茵魚玻爵銀刀競飛弄酒酣狂
中曰曙樓
召羣花兜鸞箏瑟瑟鶯啾啾羅浮山舍那得此杯邊笑指
飛瓊姊扶花倚醉樓闌東諸天花雨春濛濛迴廊作橋何
玲瓏迷離石磴相鈎通潛鱗隱爪露頭角蜿蜒髻鬢眠花
龍香雪海憶我吳門遊賦詩曾學高青邱矧此蓬萊佳處
冷香國能不花前起舞爲狂謳

參觀盲啞學校歸作長歌寄南菁諸同學

我聞委羽之陰日月不到處天帝爲之驅燭龍又聞刑天
兩乳爲目臍爲口手舞干戚摩蒼穹粵稽古昔聖世喑聾
跛躄各有職一物不廢乃爲大慈大悲而大雄東邦教育
茶火盛爨舍林立學海洪耶仁墨愛達至極閱開廣廈模

瞽宗寒蟬仗馬不鳴雁一齊陶入鍋鑪中竭來初觀盲生
室伶倫師曠皆瞍矇眼中忽見盧太翼展書摸索能明通
指頭見月證佛果人間何必誇重瞳復入一室一盲臥一
盲宛轉捫其胸導者云演按摩術着手足奪岐黃功一室
花氈坐盲女十三絃上調清宮羣鶯亂啼暗蟲泣跳珠忽
迸流泉淙聞鈴更趨啞生室講師張吻辭已窮粉痕塗抹
滿漆板河流山脈譚亞東惟見眉目脣頤指臂手足一一
動屈伸俛仰皆機鋒喑龍啞虎笑且頷無絃琴曲聲囉囉
啞生手藝更殊絕品物羅列矜神工丹青妙績牛背兒石
膏巧瘞虬髯翁徘徊四顧歎觀止偶思祖國雙顴紅搖鈴
乞食作窮丐鳴鉦賣卜扶短童有口有耳且失教哀哀盲

啞天爲聾吁嗟乎上池之水不可逢無口之瓠難爲庸我
欲撥雲霧鳴鼓鐘大呼上帝求春風庶幾凡我神州神明
之裔皆神聰

落櫻 四首

蓬萊宮闕奈何天花事匆匆又一年無力飛昇朝帝子可
憐墮落到神仙牽愁春水思桃鰾啼血空山老杜鵑莫向
忍岡前畔去夕陽紅煞忍岡前

江戶川隄不忍池香流新匯冷燕支美人顏色春無主神

女生涯夢可知蠟屐雨喧尋淚地畫橋風定寫真時謂日攝人

影曰海天我亦傷蕉萃腸斷江南杜牧之

玉樹摧殘倦夜遊任他芳草綠瀛洲歌仙身世哀花扇扇花

乃東京名妓孝母有歌仙之譽蕩子牢騷託杜秋萬古飄魂徐市墓一天

淚雨馬關樓風前莫更譚遺事人未言愁我已愁

欲學蕉翁誅玉琴玉琴芭蕉翁亦古名妓日本詩人花邊悽惻覓

知音迴風教舞天何苦流水成文海已深落魄神山仍薄
福投身島國豈初心扶桑日出春歸去贏得飄零淚滿襟

中泠詩鈔丙編

石城前集

明故宮磚歌

丹徒葉玉森蒞漁

江山六代琉璃脆
藤蕪綠徧江南地
斷雨零煙片瓦無傷
心萬歲千秋字野老
還來說故宮朱明劫
影亂蒿蓬殘山
冷碧銷王氣廢苑昏黃
走鬼風荒荒禾黍歌聲絕
御溝流水空鳴咽
玉竦無人問斷橋
銅駝何處尋明月
衰紅斜日暝遺甄
洪武猶鑄甲子年
班駁落衣凝戰血
模糊花影暈墟煙
當時濠泗真人起
飲馬石頭城下水
蜂房萬落壯秦圖
鳳闕一雙隆漢軌
鳳闕蜂房總夢中
茄花滿地可憐紅
尙書太息泥同塑
禁衛淒涼壁已空
無端一炬成焦土
斷

腸怕聽妖狐語瓦上鴛鴦帶雨飛觀前鳩鵲因風舞彫零
金甌任橫斜竟入尋常百姓家鑄硯巧摹銅爵字支床偷
斲玉龜花千門萬戶蒿萊易龍起蛇僵威勢異不容坏土
盜長陵終使臺城無半雉金馬門前蹀躞遊春風驢背欲
悲秋平墟無主花都怨故壘難尋燕亦愁遲回怕誦長楊
賦蕭蕭細柳將軍樹昔日笙歌起玉樓卽今笳角吹煙戍
一磚半壁總傷情鏽戟閒磨賸老兵帝子魂歸風定黑王
孫夢斷草猶青零星粟粉生寒色地下宮娥頭更白玉鈎
誰惜美人斜血影惟留貞婦石血影分明勝玉鈎一祠香
火尙千秋孝陵今日都樵采夜夜蒿鐙泣九幽

金陵雜詠 選十三首

秦淮

月下浮簫鼓花時盪鈿釵秦淮原不是笑說是情淮

青溪小姑祠

江南好風月妾獨唱繁霜欲信無郎好青溪峽蝶雙

勞勞亭

勞勞亭外柳勞勞亭外人勞勞亭外月曾送六朝春

甘寧墓

直瀆山頭墓悲歌俠客行何來雙野鷓猶自學鈴聲

盧龍山

五馬渡江寒青山掩淚看盧龍不能忘安忍志偏安

郭璞墓

我聞郭璞墓乃在玄武湖青囊有碧血莫誤青囊書
新洲

斬蛇與射蛇祖孫太相似新洲伐荻時未必有此事

雞鳴埭

晨雞猶未鳴宮車出如水不忍聽猿啼朝朝射雉子

莫愁湖

朝來湖上春暮來湖上秋秋來風雨惡遮莫莫愁愁

張麗華祠

玉樹後庭花飄落青溪水青溪夜夜滿可憐璧月死

長干

君家住何處妾住在長干君行向何處切莫向長安

孝陵

孝陵一坏土零落古松樾長生鹿不來石馬臥明月

舊內

夜雨瓢兒菜秋霜榼子瓜不堪談舊內無復故宮花

題陳橫山西石城風俗志

朱陳村憶古新豐杏子花時海樣紅今日石城西畔去衣

冠也有晉唐風

三竿兩竿庾園竹七月八月幽風圖此間大可容高隱洗

脚塘邊飛野鳧

瘞鶴殘銘數行字羣盲聚訟笑紛紛上皇山色青無恙時

有樵歌出亂雲

君有橫山考謂瘞鶴山
中之上皇山即橫山

病喻選八首何啻威索賦

柳

陽關西畔灞橋前
泣雨颺煙總可憐
百折柔腰拚瘦損
一春愁絮太纏綿
曉風殘月銷魂地
流水斜陽畫影天
燕語鶯啼都足感
不堪張緒憶當年

桐

一自西風拂綺寮
銀牀金井覺清寥
孤心半死標奇節
熱淚全枯付冷瓢
玄翼哀蟬棲敗葉
綠毛么鳳挂疏條
琴材自分終難中
爨下何人惜尾焦

梅

偃蹇孤山老病身
調羹事業付輕塵
偎寒幸有麤麤鶴
索

笑曾無蘊藉人
雪地冰天扶夢夜
蘆簾紙帳養花辰
東皇儻賜醫紅術
手活江南萬樹春

鵑

苦喚春歸力已賒
斷腸聲裏夕陽斜
將枯血淚仍啼月
未死浮名暫謚花
蜀國江山臣盡瘁
瀟湘煙水帝無家
鷓鴣哭罷哀猿續
同病天涯各自嗟

鶴

疇向雲間惜羽毛
等閒拋棄到仙曹
鳳鸞同苦鞭笞毒
雞鶩羞爭飲啄豪
不舞有誰憐兀傲
善鳴母乃病清高
諸天夢夢方如醉
猶挾哀聲上九皋

蠶

三眠三起奈何時食葉無聲強自持似此纏綿愁合繭爲
誰顛顛命如絲溫存紅女恩終感衣被蒼生志未衰毛羽
不豐僵亦可飛蛾投燄悔翻遲

蟬

飲露餐風劇可憐青琴淒咽入哀絃噤寒真合譏蟲史中
熱何能證蛻禪朝暮幸逃痾僂手春秋易感螻蛄年虛名
苦博知秋客還曳殘聲欲上天

蟬

羽陵曝後枯魚泣秦火焚餘弱命爭丹篆誤吞頰尾瑣白
衣慵蛻粉腰輕神仙字亦胎憂患胥役心猶昧死生省識
咬文終是病苦鑽蠹簡枉營營

賀張醇園中翰量珠四首

十斛珍珠買莫愁鬱金香煖畫堂流入簾願學呢喃燕先
祝生兒字阿侯

迎歸寶扇七香車碧玉年華正破瓜難得溫柔龍女手替

郎如意散天花

醇園嫡室
龍氏故云

學書恰侍衛夫人問字還從揚子雲葛藟真如桃李豔春
風端的要平分
爲憐珠玉鏡臺邊更課蟲魚絳帳前一笑畫眉忙未了渾
忘急就未成篇

題吳羞翁香痕匿影集

袖中一片揚州月照澈華鬢色相天選夜暗彈紅蠟淚鈔

晨癡乞黛螺煙玉溪心事含騷怨江令風情寄側篇滴粉
搓酥三百載好從悱惻悟纏綿
盪氣回腸九轉賒謾因綺語懺風華美人裳佩宜香草才
子心肝亦落花樂府遺聲存漢魏玉臺芳韻盛乾嘉錦函
一例燕支匯只是情波未有涯

宮柳用漁洋秋柳韻和吳眉孫

此是楊家帝子魂風流一種倚長門蟬鳴禁籞淒涼怨鶯
織山河破碎痕畢竟未央宜水殿翻疑太液似江村白頭
無限攀條感鸚鵡前頭不敢論
翠鬢分明誤點霜亂花成陣過銀塘曉風鳶墮纏金縷夜
月龍歸拂玉箱小字浪呼楊妹子柔腰羞折水仙王登樓

謾悔封侯覓爭似傷春老教坊

射葉知誰賜錦衣明眸皓齒是邪非煙花夢短人眠懶雨
露恩深笛怨稀采女笑攀釵燕落粉侯偷拘玉驄飛琵琶
一去哀紅柳萬里終愁漢闕違
瘦比寒鴉更可憐靈和遺事渺如煙內家閒話千絲淚聖
主恩情一撮絲鬱鬱正當經輦地依依猶憶入宮年託根
差勝荒城驛容易春風御水邊

烈婦莊張氏哀辭

菖蒲根白於雪菖蒲葉碧於血吁嗟乎菖蒲節解一彼美人
兮文貞之裔夢爲胡蝶乃適莊氏解二烏夜啼妾命薄兒生
離孃不如嬰兒子樂解三孃問兒兒囁嚅兒不能言兒有姑

兒不能言姑有夫

解四

五月二日夜鷓鴣嚇蠨螋蠨螋入我室

蠨螋之毒若螟螣蝨賊

解五

天夢夢碧翁碧民洵洵烈婦烈

金山金鐵甕鐵吁嗟乎菖蒲節

解六

新體豔詩和毛劍客同年

東家一尺髻西家一尺腰泥儂學時妝歡心何搖搖
小妹齊儂腰聰慧若鸚鵡阿姨無礙聲從歡學東語
金錶小如錢歡來繫儂衣歡心十二時宛宛雙鍼移
昨夢遊巴黎花冠入茶會見歡擁西子雙雙歌蹋臂
共歡乘飛車攜手遊淞濱淞濱多美人歌舞誰家春
爲歡繡花韉歡行向東北薦支山不紅雪山頭更白

子夜春歌

昨夜夢銜碑今夜夢銜璽開眼見喜子春夢似可喜
春風入儂懷不關儂懷春教儂管春風儂是春花神
翩翩畫眉鳥飛上木筆花黛螺凍成石歡行在天涯

子夜夏歌

急雨灑荷葉跳盪不成珠莫學急性子歡見鳳仙無
蠶務未能畢燭水忙縑絲欲得雙絲長須在溫存時
烈暑不握扇爲渠太風流儂心有冰雪儂居最高樓

子夜秋歌

朝起剝蕉心暮去拾桐淚爲底不能閒嬌憨年十四
明月上我牀停機看月色又聞牀下聲唧唧啼促織
九月天初霜沙蟹出蘆洲辛苦橫上蘆蘆花已白頭

子夜冬歌

蠟淚不成冰鳳衾不成鐵春風滿妾房今夕是何夕
味酸莫如愁味苦莫如病莫嚼盤中齏觸着齒已冷
雅蒜生澤腹幽蘭生谷底素心儂汝同寥落無知己

題雲陽張晶樓女士桐江釣客圖

富春江上客星明一握絲綸入手輕玉餌金鈎都不事魚
龍眼底是蒼生

莫愁湖權歌五首

曾過青溪訪小姑小姑祠下盡靡蕪還搖艇子去湖上湖
上藕花紅也無
打槳輕輕發權謳鴛鴦瞥見一低頭故欹鬢影餐紅尾笑

喚嬌魚字莫愁

西子湖邊油碧車莫愁湖上水紅花莫愁西子兩愁絕想
見雙顰鞞警鴉

一線秦淮繫六朝瓊花璧月總蕭條湖煙湖雨還依舊花
裏船孃燕子腰
鬱金堂小帖湖涯采罷停船去吃茶祇覺湖僧閒似鷺拈
花微笑紫袈裟

四時塞曲

萬里如飛大宛馬千金不換流沙馳薦支山下白草莽玉
門關外斜陽多顰眉淚眼攀紅柳狄女簪花貂覆首獵遊
偶逐左賢王賽舞時爲小垂手笳悲角怨難爲情朝朝暮

暮聞邊音漢家明月自今古塞上春風無古今春
買瓜要往哈密國浴馬莫近耆婆池乳酒觸唇有羶氣蠻
花入眼無冰姿地當熱帶天如火十萬燭龍齊向我不草
不木山都焦非馬非驢人亦裸漢家炎德今何如陽烏在
天燿燿無真威足使不復反抱將銅鼓軒穹廬夏
犀文欲捐吠勒輦象車乍別鮫人家黑水洶洶漲素雪西
風獵獵吹黃沙夜來羌笛翻哀曲野鷺驚飛霄雁哭山金
空化冷螢飛河玉自邀涼月燭匈奴飄忽愁無常將軍鐵
甲明嚴霜安得靜人悉九寸三邊終古疎秋防秋
奇寒能令白山死大風直使戈壁飛昨朝日出野無色今
夜雪深駝未歸十重毳幕酣羊酒醉擁狐裘睡獅吼胡姬

二八爭妖嬈彈碎琵琶雙凍手至今海上談蘇卿收羝人
去終留名冰天雪窖節自苦河梁月落空吞聲冬

庚戌仲春中旬十日寒甚雨冰且時聞雷賦此志
異

一雨蕭蕭越五日夢醒簷滴猶琤琤千紅萬紫歎銷歇耳
中忽作敲冰聲大珠小珠亂飄灑片時凍瓦生春明阿香
推車逐龍女電光閃爍寒鴉驚老奴蹙頰道災異歛歛回
首談生平吾儒亦抱春秋志發擣天畏尊五行街頭鶉結
凍欲死何況隴麥哀無生卽此已足驗稷象奇憂鬱鬱誰
能輕

中冷詩鈔丁編

燕塵集

丹徒葉玉森蒞漁

題徐花農丈水佩延香圖冊

丈於戊申冬手植水仙一本越歲春分花猶璨
然因寫其影爲水佩延香圖題詩徵和謹次元
韻

水佩風裳又一年端宜香國禮金仙十洲瑤草初蘇夢二
月冰花漸化烟洛女已忘羅襪冷江妃翻覺縞衣鮮歌成
白雪陽春曲佳種應移宋玉田

一握芳馨寄託工澧沅香草素心同煙波冷澹騷人影水
墨蕭疏大隱風仙操高彈湘水碧花瓷淺映定州紅銖衣

終是瑤臺品合蒔堯蔥舜韭中

接葉亭賞海棠圖為花農丈題即次原用坡公安

樂寺尋春詩韻

蕭齋九月生春風黃華破笑茱萸同快浮龍腦一大白故
燒鳳蠟雙枝紅花神睡醒若幽語芳心千古緝髯翁我所
思君不見十洲瑤草披圖中華鬣不在諸天外眼前一尺
飛香海臣非狂也託雲想仙之人兮盪霞珮城西花寺秋
可憐南花之寺海棠為宜春陰難買休言錢何如展卷映嬌
日朝暮清歌對花發

哀鴻

感煙台流民述黃河決口事

鴻鳴哀哀集於煙台拖泥帶水胡為乎來解一日居黃河湄

黃河之水潰堤孰令致之乃魚鼈吾黎解二蜃樓高高為官

之巢卒效厥尤河上乎逍遙解三子弟犇告官曰水來父老

犇告官曰水來官曰毋溺乃公事休來解四噫嘻事急矣乃

曳官至堤官叩首千百禱於河伯解五河伯大嘯水飛官跳

可憐百十村屋瓦無一存解六官有樓民無鳩吁嗟乎漂流

解七

燕京新樂府六首

輶輶

輶輶輶輶輿脫輻胡為乎泥中車夫欲哭不得哭嗚乎京
洛風塵多驟然一雨成滹沱哀哉車夫力曳車猶如牽象

而渡河腰折脛膠汗如雨後有推者亦良苦馬車滑達來
如飛小車觸翻人墮泥馬車滑達去如飛達官中坐顧而
嬉嗚乎輾輾泥犁地獄達官達官乃無目

老馬歎

老馬瘠且疲芻秣常苦飢生不作天閑之駿誇龍媒悲鳴
伏櫪終何爲麟麟薄笨車辛苦爲前驅時或從以二白驢
運糧運煤積疊如山馬行趨趨策之以鞭與竿馬行竭蹶
平地羊腸何詰屈糧煤云是官家物馬固吞聲言不得壓
力千鈞無乃賊嗚呼馬亦如人耳擔負太重何能爾不如
駢死櫪槽間解衣今日無知己

賣聒聒

賣聒聒賣聒聒白髮老翁聲聒聒青蚱蜢油壺盧秋蟲與
寒蟲聒聒時相呼剝木熨花成小桶牙蓋玲瓏通藕孔此
中大似溫柔鄉蟲曰可憐足矜寵奈何聒聒聲太繁聞者
當作兒戲看蟲應悽惻摧心肝老翁聒聒向蟲語當時老
佛曾憐汝養心殿裏多秋聲玉盒金龍千百羽於今聒聒
窮街頭蟲能解語當言愁蟲兮蟲兮不如休老翁語罷雙
淚流

動物院

動物院乃在萬牲園其中毛羽珍且蕃有虎有獅有象有
熊蠢蠢吾不欲觀之美哉禽乎厥惟鳳凰不見鳳凰乃見
孔雀王鷓鴣肅肅如趨踰於時爲之悚聽而徬徨但見告

天子聲太苦信天翁貌太古老鶴丹頂有仙氣文雉錦衣
作狂舞別有杜鵑啼乾鵲笑鷹不揚雞不叫烏乎籠檻居
可憐不能奮飛徒呼天怪梟野鵬狀可怖予亦拂衣從此
去

正陽門

驅車正陽門輿夫急整衣云過交民巷不容袒背馳正陽
門夜不閉正陽門內傷心地崇墉櫛比客星居塗金莫辨
橫行字角聲烏烏鼓聲冬冬鈎營絡壘自西自東輦轂之
下潛兵氣臥榻之側容軒睡鳳城一例是籠城北極原非
衆星衛憂心毀毀其如何依然恒舞而酣歌月底朱輪留
不住搖搖又向花間去

戲迷

戲迷戲迷都人士何離奇鈞天廣樂衆樂樂公卿士庶同
酣嬉摩肩錯踵不復顧一耳能容麾不去按拍聲兼喝采
聲晴雷四起知何處烏乎長庚不作桂芬死絕唱今惟叫
天子老佛西歸舞榭塵飄零供奉龜年李我聞瓊樓玉宇
高且寒姮娥鵲淚啼初乾素衣欲脫舞衣故催織霓裳興
轉酣烏虜天錢自是天家有衆生顛顛飢寒久試聽兒啼
女泣聲繁絃急管能安否

今謠

衣敝生蝨國敝生賊
水多傷禾魚笑蛙歌

無日高高在上一落千丈

鷹無目蟹無足佛無肉國無魄

雖餐壺戈春黍跛御跛瞽相瞽

鶴鳴于九皋匪鴻之哀胡為乎嗷嗷

蝮蛇噬則斷趾毒蜂螫則斷指當斷不斷乃至死

牛郎風顛借天錢為聘錢農丈人曰嘻曷不以治爾田

雜詩存二十首

蜻蜓洲上我先歸鳳凰池頭君獨飛停琴不語海水寂更

從何處尋雷威贈同學雲企韓太史二首

雷音獅吼足驚聾如此江山付兩雄長白山頭雲氣墨與

君煮酒論遼東

旅館荒涼客到稀蒼屏樓下正朝暉新霜一夜老槐醉時

見呱呱粉鴿飛揚州郡館訪湯子敏

凍雀飢寒繞屋呼紙牕啄碎未能驅主人自折梅花笑分

汝殘香足飽無因事寓感託之無題二首

零落燈花不耐挑苦吟躑躅總魂銷滿庭月色渾無賴銀

漢秋來有淚潮

二百五十二種字上下縱橫此巨觀會見君成新譯史牢

籠宇宙大文瀾予於日本書肆得新舊約一冊乃以世行各國二百五十二種字體書之者攜存

云見者諒為眼福適晤高郵宣古冊檢之事

搜到中華以外天直將四海水為泉驚天絕地新錢譜鬼

面王頭五百圓古愚者金幣約五古百種富為一復冊附以西

文洵奇
觀也

羽琤而後又逢君
祠部風流足嗣芬
祇恐太常仙蝶徒一

星藜火似殘曛
留別丁開
公三首

媧鑑萬古留頑石
不屑餘光乞列星
只是塵多宜閉口北

風吹夢那能醒

昨宵風雪寒如許
感子深情酒一卮
樓外雲陰天自醉凍

雷癡望立多時

揖別袁公一樹槐
南柯蟻夢正鼾雷
綠陰記我哦詩處寒

月依依寫影來
月下別郡館老槐乃袁莘谷先生手植
哲嗣伯庸同年夏間寓館嘗撫樹歎戲子

曰宜名
袁公槐

一白荒荒古涿洲
當時戰血染蚩尤
四千年後風雲冷安

得騎龍帝子遊
涿州大雪

朔風吹雪亂鴉盤
水自荆卿渡後寒
信是春秋復仇義更

無人解道燕丹
水渡易

定州南下路透迤
凍合河流水不波
獨倚危欄鑄奇語一

車風雪渡滹沱
滹沱

零星疑冢亦千秋
想見曹瞞後顧憂
賸水殘山餘霸氣一

鉤寒月過磁州
磁州疑冢

蜃樓如畫俯晴波
海外公輸卜樂窩
鬢霧鬢風好西子素

衣一擲看黃河
河上有人云夷樓一幢見一西婦倚闌立詢

蝸牛廬子小於庵
老作閒漁夢亦酣
數點寒鴉一株柳河

南風景似江南
鄭州道中

飛行大陸荒涼絕路入西平見翠鬢隔著水晶窗一扇獨

揩冷眼看寒山

過西平縣見山

豫山靜穆楚山雄竟日看山趣不同第二洞天吾亦過轉

憐此別太匆匆

二山首行

江洲城下柳依依廢塔荒祠正落暉添得寒山新畫稿黃

衫風送一僧歸

泊九江

懊惱荒江日易曛大姑擁髻臥湖雲小姑問我來何暮癡

注風鬢佯不聞

日暮過小姑山

藕花時別雪花還江上閒鷗識舊顏我正欲歸留未得顰

眉終負六朝山

過下關

中冷詩鈔戊編

吳山集

春感四首和沈太侔

丹徒葉玉森荏漁

欲削蒼華篆莫愁空堂香滅鬱金休二分明月仍螢苑一
寸斜陽又蟻樓癡向釵頭尋白燕醉來花裏看青牛春懷
幽咽將誰託婀娜遊絲不自由

昨夜歡聲夢珮璫今朝心事懺鑑香鏡如可聽祈神語燈
果長明禮佛光白小吹萍欺鯉鯉綠么掛樹笑鸞凰千窻
萬苦何從說目送蝸牛上粉牆

情波割碎枉勞勞翻怨東風似剪刀又見梨雲飛鈿閣尙
聞蘭珮滯珠皋夢中弱水三千遠頭上華鬢尺五高催舞

瓊枝歌玉樹有人淚眼腫蒲萄
縷金鞦韆憶下堦提爭奈相思墜碧溪
花夢苦參空卽色鶯
歌難譯狄和鞦斷腸欲續招盧鵲別酒偷分怨角犀猶恐
亂紅無葬處鴉鉏三尺手親携

眉孫寄示無題八章正太白所謂緝商綴羽潺湲
成音者依韻酬之

鳳尾香羅薄一重春愁欲散轉添濃
花憎西子嬌傾國燕
學吳兒軟語儂泥飲金莖難下咽
偷緘紅淚又開封聲塵
自笑無時寂心似寒山寺裏鐘

舊怨和恩默一回不成懽喜只成哀
題紅悔妾傳詩句研
黛羞郎擅畫才雁足鐙檠愁黯黯
對鳳花裙杖憶初開鴛鴦

繡徧終何苦猶自鍼神詔夜來

也覺當花見亦羞
寒衣欲避苦無由
桐心未死琴焦尾
筠骨相思扇聚頭
雲瑣瑤宮仙犬吠
露涼銀漢客星浮
情絲難織根難種
怕卷珠簾問女牛

姊妹花前盡妙齡
無端落葉感飄零
同庚獨薄還疑命
六甲難飛枉乞靈
涕淚瞞人翻飾笑
醍醐請佛不求醒
春風怕已成憔悴
掣碎高枝頂上鈴

那有閒情更繡詩
小園容易了芳期
歌成子夜愁長夜
話到兒時憶嫁時
一握恩情紈扇柄
不平心事笠枒前
頭鸚鵡能饒舌
萬咽千吞祇夢知

買畫羞爭紙上妍
失機莫更說從前
厭看翡翠雙飛翼
却

贈珊瑚七尺鞭蓬鬢何嘗非國色華鬢原不是情天鴨鑑
塵滿芸灰冷一任瑤函脈望仙
疑雲夢雨儘參詳還讀離騷廿五章我佛只宜雙闔眼美
人纔合九回腸清釐冤債難焚券檢點啼痕強疊裳折得
芳馨春正暮楚魂競渡又端陽
衆生法界落花輕重把傷心訴墨卿回首光陰曾過客昨
宵風雨故疑兵相逢欲證浮生夢再世能忘太上情珍重
一雙紅豆子中庭啼煞杜鵑聲

水災歎

海門吟社第一課

大陸不沉禍不止十萬蛟龍齊出水雨師煽虐風姨驕浩
劫茫茫乃如此一省一郡成偏災博施猶病哀鴻哀殺機

天發不可測忍使衆生皆盡狂瀾來噫吁嚱民其魚世無
鄭監門誰繪流民圖牽衣扶竹滿路衢沿門乞食號且呼
是何婦嫗十八九男子險已鋌而走我聞陸巷鎮常熟城
飢黎土匪千百人橫行入市劫大紳得米萬斛錢萬緡悍
然不顧爲亂民噫吁嚱危乎殆哉流民一變至於寇流寇
之禍誰胚胎格殺勿論殺之那能盡空見流血成江淮噫
吁嚱危乎殆哉大陸不沉禍不止海水羣飛從此始神禹
不來長已矣

秋興雜詩三首

蘆荻何蕭蕭江水何滔滔鴻雁何磬磬十九傷其曹飢羽
那能飛矰繳將焉逃不如須臾死墮落波與濤江頭有老

漁爛醉方既陶

熠燿中宵行飄星燭微幽皓魄所不至即此足歌謳大嶽

積以土大波成以漚吾儕賦力弱尙非桎梏囚

昔我山中居秋霜剝叢木重之以飄風落葉何槭槭老僕

日擁簪興至輒哦曲寄言頭白人遐心在空谷

哀韓儲 海門吟社第二課

韓太子如日本觀見日皇因留學母死聞電音

頗遲悲憤絕返國後稍盡喪禮旋復赴日爰作

長歌哀之

二千年後殷墟史麥秀黍油歌忽起鳴綠江流碧血花無

量瀉入高麗紙一自伊藤塞上戕燕丹力竭抗秦狼檀君

國裏無喬木箕子祠邊易夕陽夕陽喬木誰爲主三足赤

烏能翼汝宰相荻苴自列侯孱王傀儡終俘虜傷心太子

更琉璃朝鮮詩人柳惠風二十一都金犢雞林謾述奇忍

淚朱蒙甘父日高勾麗降下勾麗琛航不向中華貢入觀

倭皇餘隱痛龔山一會那堪圖東史夏禹十八年扶婁朝

焉嵩岳三呼無奈頌問之陳無作對曰古詩有嵩嶽三呼而

繞殿青之虎口分明辱楚囚飛仙無計覓瀛洲奴顏疆學

東京狗故狗多短尾謂之東方虛缺弱肉真成孺子牛朝天

悔入麒麟窟樓與地勝覽麒麟窟在平壤府梯穉宮內浮碧

馬入此窟今從地中出朝石在窟南思親怕見蟾蜍月故宮

別有望兒樓白盡高堂明鏡髮金鷄一夕柰花開烏鵲啾

啾繞闕哀鄭松江漱關東別曲弓不見子規啼碧樹竟傳

王母去瑤臺電音空達蓬萊島王孫無夢通芳草萬樹蠻

櫻自在紅一襟寒月何曾縞無端驚覺斷腸烏攜笈吞聲

返舊都已悔渡河歌麗玉可堪廬墓泣真珠與地勝覽東

和府龍山谷珠沈玉碎終何補誓茹臥薪嘗膽苦畫象空

招聖母魂素衣莫射天狼羽承歡欲慰李王難喫菜於今

倍覺酸柳惠風咏沸流王國詩朱蒙不蕊國山河皆死氣

青宮花木盡悲觀匆匆又向扶桑去鳳子龍孫笈裏住一

死終看化杜鵑齊飛未許隨孤鶩國破城春奈若何韓仇

未報子房多謾將萬萬波波笛東京雜記萬波息笛歷代

萬波笛吹作怳怳怳怳歌大家幾不保柳惠風新羅懷古

詩怳怳歌喧怳

酬眉孫中秋走筆見寄韻

風姿瀟灑王柳村詩才犇軼鮑海門眉孫天許抗千古擲

之草莽惟天恩有拙不向空山藏笑予騎馬如知章自投

法網亦良苦衣冠傀儡時登場列諸人表知何格土壤細

流吾不擇掉頭終欲返初衣手抉銀河洗胸膈雁聲一夕

催吳棉摩挲寶劍空成篇起舞明月當中天西施不來誰

為憐眼前萬變况電火夢中一笑徒雲烟噫吁噫宦鄉鬱

鬱那得快何似高歌臥江介呼梅作妻林逋驕以石為兄

米顛拜天風今夜吹浪浪廣寒宮闕天花香安得左掖碧

山王右招白石姜驂逐上下詩星狂願醉玉露三千觴隨

風咳吐生珠光

鸚鵡洲

一脚翻鸚鵡洲一拳碎黃鶴樓是何意態雄且傑一時漢
水驚浮浮誰歟犇瑞督激誰歟逃張提彪咄咄都督黎昨
日協統今黨魁士卒謹噪揚漢麾海陸相來何遲天戈倒
揮雷艦飛吁嗟乎交戰團獨立國壁上諸侯歌且祝哀哉
黃梁猶未熟

偕漢珊伯未意園實卿留園賞桂

留園水木清且妍迴廊屈曲藤蛇纏吳宮花草蕪荒煙存
茲一角華鬢天靈樨百本高枝牽秋飜十里聞龍涎雕鞍
油碧裙屐千婆娑起舞何翩翩黃金之雲迷蕙榜繽紛花

雨天風扇飄鬢拂袖攢釵鈿蛩醺蝶醉么鳳顛吳姬婀娜
鳴管絃花陰散坐開瓊筵掇英入酒珍珠圓折荇作珮瑤
瑤鮮吾曹穿徑躋巉巖廣寒宮闕翬飛騫倚樹難爲吳質
眠拊石且當洪厓肩蛾眉新月流娟娟衣香菴謁催歸駟
安得百度相流連使我凡骨成金仙

寄懷百尺梧桐閣主趙枚叟

酒甕平生足擁城先生解與麴生盟清標上配龍門樹險
句窮搜虎穴兵天爲鈔書留巨眼佛因變相動悲情君家
芍叟風流絕賀世重飛老鳳聲

得陳大倦鶴叨埠書賦畲

鬱鬱何堪老廡春滄溟飛渡莽雲從恰當熱海天邊月苦

憶寒山夜半鐘牽我夢魂惟雁鯉壯君詩膽有虬龍成連
一去琴絃冷獨上危樓看亂峰

題王戟髯推事寰宇懺尋吟殘稿

訪碑寰宇吾聞矣君獨尋詩汗漫吟摩詰前生參慧果方

壺小住懺仙心

君近寓方壺小築

蒼涼兒女英雄淚

中有弔茶花女墓拿破崙

墓諸作

蕭落天風海水音我亦袖中餘碎稿珠光龍氣漸消

沉

感懷疊和呂意園庭長四首

浮生百篆幻鑪烟一度低頭一惘然祇覺此身如隔世不
知今夕是何年槎枒酒膽張金谷宛轉詞心託玉田塵網
十重纏莫脫看人學佛學飛仙

大舶凌風挾遠烟浪游詩卷足淒然袖中東海狂歌地簾
外西山惜別年擊筑幾曾聞狗市買書猶自夢神田鸞飄
鳳泊終無悔能逐流雲卽散仙

糺縵非煙又是煙卿雲曲奏想當然真如夢幻黃金界猶
未分明碧玉年兩部蛙爭喧閣閣一羣魚戲亂田田白猿
歷盡人間劫只恐難成紫府仙
苦戀吳山一髻烟西施鬢樣尙依然偶因流水思今日還
向斜陽問去年說法荒邱空有石看花香海易成田吾家
江上青峰好且自安排作隱仙

讀列子五首

盜有道國氏教盜無道向氏倣東郭先生啞然笑

醉者墜車雖疾不死醒者墜車殆矣殆矣
擾擾萬趣起矣華子操戈逐儒須臾之忘可復得乎
滋穴水曰神瀆蘄和平宜共飲不競爭不媒娉不驕忌不
夭病是何國曰終北
憂者所以爲昌喜者所以爲亡爲是言者衆曰不祥

印度故宮詞

海門吟社第三課

恒河之水無情碧恒河之血無量赤琵琶七十二條絃彈
落宮花腸斷絕何事歌聲續斷腸零脂賸粉尙斜陽雪山
北走餘焦土戈壁西行盡戰場花頭蠻髻司香女能作籠
鸚鳴咽語箕踞曾瞻七寶冠笙歌更逐羣魔舞銀杖分明
憶昔年聖江如帶佛垂憐海山金碧輸天外漢土袈裟拜

陛前法宮高拱圍珠翠極樂園林騰瑞氣錦衣仙擁勝鬢
妃石闕鬼鏤阿育帝紫帶黃裳更出遊虛空天子號無愁
象輿緩緩花前醉螺鈿喧喧月下謳神牛罷吼靈獅睡毘
嵐撲地聲何厲蒲萄移種雜荷蘭重以天驕英吉利龍象
無靈護國難珊瑚五尺鳳檠寒投崖太子身先碎辭闕金
仙淚未乾檀枝欒葉凋殘盡商戰果然贏利刃已傷魏殿
慘分香更促秦王歌破陣身毒其如飲毒何引刀割肉那
由他響頭枉喚千聲佛皺面愁觀一曲河零星紺宇阿房
火殘額塗金窩里窩里朵行宮也須曼猶開稱意花頻婆自結
相思果齋飯無人禮世尊阿難乞食徧雞園啼春夜夜迦
陵苦望帝年年孔雀冤我聞如是宜歌哭藏衛又傳新佛

國自大何堪踵夜郎前車未免忘天竺萬劫娑婆一夢同
山河破衲那能縫樓奴自戀東方樂莫向西風問故宮

虎口謠

三月廿七夕電火明竿梢與予姜與陳薄醉翔且翔金閭
大道旁忽起風波濤一時駭兵變犇者叫者囂急上利昌
樓衆客紛啾嘈彈丸撲窗來頗黎聲蕭蕭大軍斬關入趨
趨還嚶嚶予乃避入房插翅難爲鱗擊槍咄逼人熊咆而
虎哮掠我頭上冠解我腰間縑攫我鼻上鏡奪我懷中鈔
榻上枕簟衾架上箱篋靴掖之肩之行不辭負荷勞謂予
猶有懷懼以拳銃刀我曰衆無然慳念疇未銷一索再三
索我腹實已枵開襟與衆觀衆口猶嘵嘵傑館三重塔巨

寇千百曹甲室復乙室忽下復忽高此來彼又來欲逃安
可逃舐糠且及米亡羊難補牢將無盜與賊口口呼同胞
肩章猶在衣四五四六標誰知芥蒂爭乃爲瓜蔓抄車夫
乞丐兒土匪鄉曲豪聯翩來拾遺共產義竟包姜子已無
裘幸我餘一袍用作大被觀溫若挾纊驕羣寇乃厚我藉
免寒蟲號一夜四五起怯鼠時憂貓但聞碎訇聲雜以兒
犬嗥鬧絕轉成戲幻絕渾疑妖晨光漸熹微嚶出聲狂騷
披衣疾出門火燄熊熊高急呼姜子行回顧倏已毛毛無古通
陳子掖予奔亂踐田中蒿踉蹌至留園瞥見仙源桃飛登
池上亭露坐魂自招紅鱗三五尾瞰我荇藻交我始識魚
樂恍惚莊遊濠議士雜沓來各各譚昨宵或臥高屋脊或

隱頽牆腰或出從狗竇或伏潛馬槽身外半無物喘定翻
騰嘲城門亦已閉餓守終無慘不如冒險行衆意仍怛怛
奔輪戾車驛鄉友齊謹跳楊柳吳李朱于史陳王茅姜子
亦在茲各各譚昨宵或臥高屋脊或隱頽牆腰或出從狗
竇或伏潛馬槽身外半無物喘定翻騰嘲予獨惜猶存百
感紛如潮蘇軍有嘉譽此舉胡乃糟豈無督師者海上方
逍遙虎視正兢兢鴟羽方條條乃自壞家居同室戈爭操
金錢不足惜大局將無搖衆頗踴予言熱淚手自揩含淚
上飛車倦極夢轉饒髣髴行鬼村四吠聞狂獘髣髴遊珠
淵千室啼哀鮫髣髴見阿房一炬土竟焦髣髴登昆侖大
呼帝乃聲不可思議界萬點空華飄車中築夢國安得長

遊敖嗚嗚汽笛聲殘夢驚寒颺見我故鄉城載奔吾能趨
我親見我歸怪我何蕭條我婦見我歸怪我何炎歎我子
見我歸泥索蘇州糕我兄我弟來各各詢我遭我乃一一
言衆口呼蹊蹊我友曳我出入市相招邀目中何所見將
士皆嫖姚往來灞上軍兒戲爭輕桃營制未可廢雜處毋
乃淆縱虎滿市衢後患將何消我從虎口來請賦虎口謠

中泠詩鈔已編

石城後集

重至石城

丹徒葉玉森蒞漁

劫後沙蟲淚欲零殘山依舊六朝青
戈鋌一奮銷王氣笠屐重來作客星
孫楚樓頭黃鶴去莫愁湖上白鷗醒
荒台說法空花雨何似吳邱片石靈

次韻酬伯未並懷戟髯

王髯古怪髯奇清有如鐵劍銅琴橫
大瓢在手偶然醉萬籟希聲時一鳴
入獄衆生誰使罪過江多士總能名
幾回欲續潛夫論奈此蟠天際地情

王髯以小方壺雪後賞桂詩見示作長歌報之

小方壺乃是十洲仙人之所廬王髯酒酣拔劍起雪花狂
舞天花羸於時寒飈瑟瑟蒼龍噓鸞偃鳳縮相號呼春風
忽地下遊戲散花天女來徐徐袖中攜得月窟四時桂擲
之階下驚花奴髯翁聞之拂髯笑便須一飲三千觚摘花
嫵媚插雙鬢群兒拍手爭擲揄玉璫更寄一枝遠江南故
人珍抵珠我未見花見髯句髯牽袂遊清虛霓裳一曲
那可聽素衣夢醒嫦娥孤山河大地幻奇影此花合向人
間居髯家摩詰其仙乎雪中乃作芭蕉圖惜髯指凍不能
畫天教寒月來偷摹賤子鹿鹿塵滿裾蓬萊空掖櫻花姝
小山招隱亦負負淮南雞犬皆立都方壺一角倘我惜直
思吞花臥酒爲髯徒吁嗟乎此花本是黃金粟一歲居然

能再熟今日哀鴻正滿天何當一飽嗷嗷腹

精忠柏行

武侯廟前有老柏杜陵爲作長歌行風波亭下亦有此令
我欲歌難成聲岳侯大節武侯並死而後已同堅貞黃龍
痛飲志方猛誰知亭下風波鳴岳侯死矣柏亦死惟柏能
肖侯生平岳侯不死柏亦壽惟柏乃獲精忠名僵龍植立
死不仆往來疑有侯英靈咸豐歷劫燬於火斷之爲九鬼
斧驚本來百折永無悔自有浩氣千秋生海東碧眼攫其
一渡海當遭蛟龍爭楠公墓上那有此琪林瑤樹空枝撐
其餘八節莫敢動縱橫八陣疑奇兵如土委地不可久程
侯伯一見中心怍棲霞山麓有祠宇侯神所託丹爲楹階

前尺地合畀汝柏亦歡躍聲鏗鏗移之樹之八爲一立如
積鐵何崢嶸山魍奪魄野狐遜神物終非天可櫻吁嗟乎
柏兮柏兮歌且聽世間不朽乃精誠墓前老檜作何語湖
上梅花惟汝馨

寄懷趙枚叟先生

寒來待雪宜圍炭老去傷時厭說棋掉臂游行成獨往拂
髻沈默看群兒一襟太白飛仙淚李吟白先生逝世叟有哀輓詩兩袖淵
明飲酒詩容易北風吹歲晚謾因春訊問梅枝

贈鄭倅忱提法

法界脩成黑獄昭大江南北頌咎絲畸人吐屬幽并氣老
手文章渤海潮尙有餘情論金石故應碩望重瓊瑤燕臺

一去天風過擁髻吳山黛不消

玉蘆以和子礪丈無題四首見示依韻酬之

鳳髻蓬飛睡起時鳴鑪宛宛裊煙絲翠眉欲凍愁臨鏡玉
爪初寒怕賭棋薄慧已輸花惜懂小癡還乞佛慈悲素梅
開落渾閑事鈿笛誰家苦苦吹
飛仙無那學雙成偷誦全瓊上口生梨夢不教啼鳥喚楊
枝祇管送人行目空海氣登樓怨心感春風入袖誠鳳泊
鸞飄終是命未妨撒手下瑤京

幾回搔鬢問蒼冥爭奈鈞天醉未醒絕跡飛行憐姊月垂
頭鼾睡惜奴星輿圖四角傷心繡塞曲千回掩淚聽杜若
自愁蘭自笑美人遲暮獨娉婷

鸚鵡前頭不敢論一簾斜照易黃昏
新歡苦憶兒時締舊曲慵當子夜翻
海水無情量碧怨天牢有力鎖紅冤
東風更比西風惡鎮日顰眉獨掩門

汽車過龍潭寫望

十幅蒲帆拋却久飛車依舊入龍潭
遙峯古翠生英白落日寒紅射蔚藍
老特戀兒耕已倦飢鴉樹黨戰方酣
勞人自覺勞勞甚安得依山結草庵

樊山先生近曾有和瓶水齋詠物詩因效爲之

簾波

晴漪瑟瑟瀉簾櫳可許微波一語通
香篆觸鈎浮潏白落花撲桁漾漂紅
望穿秋水誰家月盪動春心昨夜風捲起

黃河慵更看美人梳洗正愁中

香字

天香法曲入簫聲字字回文宛轉縈半偈
燒餘教佛認成段 梵式詩燒餘 相思灰盡爲誰情
癡邀玉女焚心篆笑替瑤英印乳名薛瑤英小 莫誦柳枝龍瘦句
故宮熏冷祇啼鶯

燭淚

星星蠟淚促更籌紅是相思一串兜都爲風流
還惜別半因花落自生愁夜深杜宇同啼月露冷棠堦忍照秋
莫話燭龍銜恨處至今烽燧未曾休

酒花

頓覺槎枒發肺肝酒花入口帶餘酸
逃名欲向杯中坐醉

眼翻疑霧裏看素手斟來曇一現凍唇吹罷齒微寒咄嗟
謾詡成春易須識當時醞釀難

寄懷芷澄丈

白首詩仙薩雁門春風一例向人溫車臣萬里留行卷蝶
史重編有淚痕悟徹滄桑終是幻歸來海嶽尙無喧眼前
差喜陽和轉看取花天五色旛

啼鳥

訟庭花自閒時聞啼鳥聲啼鳥何不平春風難爲情春風
匪弗仁花落紅亦驚蛛網牽高絲飛蟲胡爲嬰大哉佛陀
悲無以超群生

書李務成推事文稿後用山谷贈李輔聖韵

百折千盤湘水流李髯豪氣挾并州偶逢賤子垂青眼未
信才人易白頭寂寞空堂鳴廢瑟蒼涼浮世夢扁舟醺醺
說法矻頑石誰念生公在虎邱

太液四首再疊子礪丈與度青聯句

太液池頭水煖時青顰眉入畫柳搓絲鸞釵雙鞞羞窺鏡
漁鳳幄平分戲門棋獻壽能令天子喜青拈花還乞佛陀
悲瓊簫未是無情物漁偷得霓裳不敢吹青

暗擲珍珠與目成青上林梅子漸酸生花冠慵向春風整
漁繡幃偷隨曉露行望影空憐河鼓遠青慰愁終感雪衣

誠那堪一夜甘泉火漁素袂倉皇出紫京青
故宮消息問空冥青劫後河山半醉醒幸免淋鈴啼夜雨

漁翻教掩袖哭秋星入懷紅日曾無夢青咽淚青琴尙忍

聽胡蝶未知春有限漁舞衣猶自弄娉婷青

素鸞身世總難論青散盡宮鴉日已昏變徵哀聲吹笛破

漁移宮殘曲帶花翻銀河夢促天孫命青碧海心寒月姊

冤香閣尙留參佛地漁莫因風雨怨長門青

錢念慈費玉蘆呂意園王戟髯沈葆申邀醉吳市

酒家

歲寒不信天如醉來訪閩胥賣酒家螺瑣分澆心上淚豸

冠同悟眼前花神仙未定輸梅福文字猶堪傳李娃身世

蒼茫復何語又携風雨上飛車

哭東台楊冷仙同學二首

芙蓉江上還風雨記得埋頭演草時冷骨獨標常寂處仙
心偶雜一題詩幽探河洛傳立學遠走青齊作大師苦爲

瓊花拋涕淚才人未免是情癡

一尊危語逼霜寒變相河山着手難未許立言希太上於君

省一議員當選竟教永別在長干疇人心血天能壽君家上後一員當選

稿切惟算關塞咽喉劫未闌君以喉疾死從此楊絲愁更挽稿切惟算

曉風殘月有餘酸

小樹自檳榔嶼歸國爲話南洋羣島風景並痛譚

時局感賦五十韻

漢上回炎運穹荒走火維虬髯非辟世鳳德竟居夷異域
曾何陋才人信不羈一年傷別久萬里怨歸遲示我南飛

句歌君遠上詞多聞風土史非想海天思託跡依檳嶼從
頭寫竹枝雨晴山上下涼燠日推移蟋蟀鳴三月芙渠采
四時剖椰瓢有種剝橡樹無皮地煖衣皆白風乾面半鰲
流連珍臭果罔兩擁蠻姬佛國哀禾黍蘇丹泣豆箕宮車
晨駕象鼓樂夜吹蠶蔗酒沈沈醉檀香息息炊冕旒仍傀
儡金帛與羈縻集議來同訥刑囚畫諾疲已非驢馬制合
受犬羊訾獨我僑民衆能窮鑿空奇斧聲林共入銀氣穴
爭關長袖凌風舞危樓倚海支違邦能戴漢關土抵遷岐
在昔逃秦暴相期撻楚羸朱家禮游俠頰尾集流離卒以
風雲會終揚鐵血旗天池鵬展翮阿閣鳳來儀吾子揮雄
筆斯文耀絕陞七襄終日織萬紙挾鷗馳刮目鏡爲寶治

聾酒最宜卿雲歌紉縵君主檳榔嶼光花雨散離披更以
舒文暇聊爲放浪嬉婆羅洲月赤麻刺甲波黦吡叻浮鷺
幻蘇門蠢豕疑顰眉頭痛女赤足爪哇兒飽飯橫途慘投
錢沒水癡七洲洋是淚三寶壟如糜北雪來歸候南雷出
發期心紅瓜上市眉綠柳垂池白裕猶香港黃裘已滬湄
炎都真樂國中土有寒黎山雉空三喚梁鴻更五噫神皋
爻革鼎大陸劫埋棋未覺人心換居然客氣爲鴉爭千樹
黨屬竊萬民脂風雨漂搖痛烽烟起伏危生王頭易斷活
佛臂難劓莫唱薦支曲空懷涿鹿師海嶼終是恨台築已
成謬瘖惜鷓鴣口愁看混沌眉欲醒天醉夢除乞佛慈悲

雜感二首

野雉何啾啾田鶉何奔奔豈獨雉與鶉亦有時髦人云是
西海風厥象文明眞目挑而手招卽此成婚姻父母與媒
妁棄若陌上塵朝結巾與襜暮分翼與鱗離合何自由汎
愛斯爲神嗚呼其道苦休矣夫婦倫
閭里號大師自信一何深道是申韓家將以昭冤禽朝上
離婚書暮爭析產金橫天厲鷹爪在庭揚鴉音仁義飾其
吻利欲熏其心煌煌樹大幟其道乃綠林什九少正卯僞
辨各自矜惜無魯司寇此輩當誅今

題林弢盒墨繡堂碑選雙鈎本

君不見春風婀娜飄游絲明月皎潔描瓊枝銀蠶眠箔有
靜態青蟲食葉生奇姿是邪非邪美人影卽空卽色菩提

思天花亂落自如意神光乍合夫何離眼中徇怳迷此衆
幻相乃是弢盒林子手寫雙鈎碑十鼓碣何瑰奇龍股虵
角紋云回三公山何威儀方珪圓璧花葳蕤石門衣帶肖
褒博瘞鶴殘墨其分支西狹戈戟正嚴肅封龍一體非同
規蕩陰令表獨凝固有若白玉墜冰爲天發神識更殘絕
乃如梵篆經幡垂弢盒百選獲精本繡之以墨供臨池心
細若髮手若莢神乎技矣眞我師小蓬萊集不足異徐隨
軒本安能幾噫吁嘻今何時西方法盧競奇字東方伊呂
爭談資一丁不識足名世何況篆籀分隸歧中歧煑字那
得療腹飢弢盒不顧笑且嬉且持片紙邀我題回腸盪氣
成此詩我詩自信非諛辭請看激素飛青閣別有千秋未

可知

中洽詩鈔庚編

從漚集

丹徒葉玉森莊漁

登寶蓋山與奚度青陳倦鶴聯句

我佛何年遺寶蓋青一山突兀壓羣山接天雲氣四圍白
漁墮水曦輪五色斑有女高邱掠蘿帶樹是誰空界造華
鬘薦支慘澹昆侖碎青百感茫茫着此間漁

渡碧海有感與張伯未奚度青聯句四十韻

滄溟浩無垠搖空射寒碧大哉汗漫遊未未覺天地窄睇
鳥緬遙岸青瞰龍俛閱澤日落不成朱漁浪卷忽散白四
圍涵天光未一覽了山色沄沄摧坤維青翁翁闢靈宅鮫
人胡泣珠漁淵客尙懷璧運軀徙南鱗未培風振北翮清

流匪媚世青狂瀾誓安席衆濁不可排漁羣飛那能戢大
人時一闕未東方見三易悽悽精衛心青沈沈素女魄懸
懸紫蜃樓漁滔滔赤虵液禍水無恬波未浮燐閃妖焱匪
惟日月驚青常恐滄桑厄昔聞十二城漁乃在蓬萊國綽
約多風鬢未芳馨吐靈繹芝宮閱年歲青藥爐煉晨夕餐
玉自有法漁渡泉乃得息叩額呼青霓未騰光蜚赤鳥瑤
池大歡會青星人列千百踰踰十洲賓漁濟濟三島客不
聞鷄犬喧未但見鸞鸞飭脩月剛運斤青補天媧獻石玉
闕何莊嚴漁金母自恭默哀哀下界士未飛行思絕迹紫
污未湔衣青綠筋爭絰籍仰喙接翔魚漁翻身隨退鷁毒
龍罔歸鉢未狂獠乃亂奕修羅却未終青天魔舞方疾嗟

彼測蠡智漁寧有回瀾力孰乘東家桴未疇作大川楫水
母行已迷青井鼃說無益變化萬蛟魚漁礪礪一霹靂虛
懷納衆流未駿氣擺羣慝孟晉揮秦鞭青和樂倚娥瑟左
攬綠髮祛漁右挈青眉嬾美人來西方未穆滿遊八極望
洋祝太平青見嶺祈大吉吁嗟碧海情漁緜緜永無竭未
夜泊威海衛望劉公島
此是傷心地荒荒海不威漢家棄甌脫客淚落征衣一夕
風雷定兩邊星火微劉公爾何語乃亦爲人鞮
椒門四首三疊子曠丈韻與度青聯句
素鸞孤咽捧心時漁續命虛牽五色絲天上花飛三月雨
青人間劫冷一枰棋移枝風急哀蟬病漁墜地雲寒謫鳳

悲世世生生終負汝青玉簫無主爲誰吹修
已是桃花薄命成漁瑤池苦苦祝長生滄桑幾見胡麻熟
青風雨翻催落葉行螺贏心灰前夜夢漁蟪蛄魂戀在天
誠可憐贍部金虛索青撒手匆匆返玉京漁
青春忽死海冥冥漁臥月姮娥眼未醒妖鳥竊脂噓毒霧
青雌龍銜燄奪孤星柰花慘白簪仍上漁薤曲淒清笛忍
聽况有啼螿助腸斷青紅心衰草故娉婷漁
玉棺功罪付誰論漁痛語零星燭影昏鸚母虛聲何苦鬧
漁獠兒新局轉愁翻江干斑竹空留淚漁井底珍珠定訴
冤宮史從今應絕筆青更無閒涕到椒門漁

海上大霧

風鬢霧鬢千龍女手弄綃裙擁海來一氣氤氳何所有諸
天混沌我能開蛟魚已醒翻長夜舟楫都窮亦散材臥聽
倭孃吹尺八餘音嫋嫋爲誰哀
車過三保浦一帶松多異態爰長歌寫之
一宵雷穀麟天風扶桑旭日初瞳矐眼前不見蓬萊宮飛
來十萬蛟蚪龍掀髯拏爪羣相從雲邪水邪何空濛黃山
雁宕青且葱赤松近我排蒼幢山翁偃背如張弓溪苗挺
臂交持撞亂頭玉女猶鬢鬆長眉羅漢殊恹恹千輪百態
圖難窮畢宏章偃雙手庸吁嗟昔受秦皇封胡然天矯神
州東化爲濤籟驚癡聾屏絕巖石成巖崑安得軒帝來崆
峒頑鱗孽角雌不雄羈之縻之爵以公弗則斧鉞摧枯同

狂歌起舞飛車中拊掌者誰奚君侗木鞋奴子方惺忪且
指雪嶽朝光紅

偕奚度青薛夢梅追涼日比谷公園

炎颺扇海山樓居抵火穴赤足披袈裟和服狀中熱猶沸

血清遊趁斜曛策電去如瞥名園環碧陰噴水滌塵屑風

鬢何亭亭牽衣雙媚絕冰花蒲萄漿入口嚼紅雪負手百

徘徊歸衫盪新月

上野觀明治紀念博覽會感賦與度青聯句

博桑健者明治帝青赤標一怒羣藩廢螳蛇夭矯騰蒼虬

漁觀雀委蛻逐金翅御宇四十有五年青東方大覺揮先

鞭神山那得不死藥漁坐見寒日沈虞淵烏號墮地淒遺

挂青闢館忍岡建哀會櫻花散盡環密雲漁蓮葉翻反遞

微鵠木鞋男女肩相摩青吾曹浪跡隨其波廣場十部幻

暮色漁曲道百塵監妙娥裝點歷史耀神武青宮闕金銀

若可親伏地倭鬢拜輦車漁觀風仙節飛樓櫓箕子兒孫

涕淚潛青牆陰讀詔布衣屣篋枉奏公無渡漁禾黍誰

哀帝不還傷心肘腋開兵燹青恨史何堪重一瞬蟒衣垂

首獻臺灣漁虎騎駢肩收旅順若所快意吾所悲青夜郎

自大矜天威樓臺一寸蟻酣夢漁優曇頃刻螺狂吹今皇

瑟縮承圭瓚青草莽睽睽目且睥矮屋之中伏死聲漁覆

巢而後無完卵秋水不作白浪生青風雷革變險象呈獨

夫安得擁萬世漁弱肉終見招羣爭吁嗟乎虎兮爲鼠魚

爲龍青昆侖峨峨萬嶽宗拂衣歸去醉千爵漁夢中射日
彎長弓青

哭阿麟

造化太兒戲兒戲乃及兒生之復死之造化亦何爲汝母
嫻弗壯始婉病且羸兒生卽失乳哺以牛乳飴幼小體尪
弱惡疾時相罹兩度垂已死棄之橫牕楣一再得不死長
壽疑可期
大父與大母愛兒若拱珍教兒識書字挈兒行姻親謂兒
當非常錫名曰阿麟汝伯尤愛兒見兒笑掀唇兒亦愛汝
伯出入相爲羣東樓啜新茗西樓燕嘉賓陸行乘汽車水
行飛燄輪往往挾兒俱不辭蛩駘辛我自守我嚴兒意殊

逡巡

六歲兒入塾塾師蠻且咻兒質雖聰明跳躑殊自由喧喧
夏楚威時一破兒頭九歲兒入校校師溫以柔鳴鐘兒上
堂鳴鈴兒退休校師向我言作字能凝適算數性尤近演
草常獨修餘藝竝能嫻宛轉爲琴謳疇人美術家我志卒
未酬有兒亦足慰勉勉箕與裘

癸丑月在午我時渡海中櫻花已蕪落殘日明衰紅兒嗜

繪葉書日本設印畫明市以作郵筒彪彪華盛頓虎虎拏

破翁東鄉與西鄉亦復真英雄一一寄吾兒願兒常欽崇

誰知兒在牀已投死網中擲之病枕旁魑魃生鬼風

汝伯寄我書道兒病纏綿牙癱與耳疽旋起而旋痊繼之

以赤痧申之以白咽黑虎白虎湯羚角蝸贏涎一切苦寒
劑納腹罔不全譬移冰海水沃之火山巔內陷聲復暗命
若殘燈燃我方居海山兒已入黃泉汝伯不計我恐我肝
腸煎客夢乃慰我見兒猶安眠
淞水飛驚波烽火連江城汝伯促我歸海鳥隨帆行我歸
至江干汝伯來相迎嗚咽道兒死相向哭失聲入門更慘
惻略略談征程大父病在床大母淚欲零汝母已先啼哀
聲乃縱橫知兒望我歸我歸兒或生我本不知醫兒命况
難爭忍淚慰同室我更胡爲情
家人瑣瑣言述兒病中事大父中風久不能吐隻字方兒
初發炎大父忽會意起言兒必死涕泣日數次如是三日

後默默復酣睡先靈或來告故有豫言智又云有神來問
兒習算未兒病頷且磨神喜譽兒慧神乃促兒行兒言極
懇摯我有大父母我有父母弟我有伯叔姑我行安忍置
嗚呼神愛兒兒乃一切棄

二日廿二日兒生辰則良六月有六日兒死豈不祥浮生
本若夢人間卽夢鄉匆匆十二年兒夢殊弗長丁此衰亂
世百歲徒憂傷兒死亦至樂恨不爲國殤我昨視兒墓墓
門草已黃小蝶拂衣飛令我心感傷將毋兒遊魂宛轉憐
秋芳山鳥爲兒歌野花爲兒香兒其永宅此我夢方徬徨
鳩江法院歲闌期白中磊不至予將入都與指微

聯句因以志別

夢醒蟲塵劫茫茫着此間凍花乾半樹漁赭色冷殘山城
小風能撲微官多政轉閒浮生本如寄漁聊與共酡顏微
之子則不至參差誰爲吹一鷗寄淞水漁雙鷺落江湄芳
草天涯夢微浮雲日暮悲無情是帆葉漁葉葉繡將離微

玉鳳曲爲鳳奴作

瑤京十二環青樓千鶯百燕鳴啾啾裁金削翠築阿閣若
個朝陽第一流有美嬋娟偏出衆九苞蘊采迷香洞玉樹
前身定麗華玉鳳紅芙小影疑輕鳳裹雪揉雲一尺腰玲
瓏宛轉尙垂髻放嬌袖底癡銜佩匿笑帷邊故弄簫二簧
大鼓都能事學成不屑邀人醉本是燕脂北地花恰含金
粉南朝氣有時喬幻善男身衛玠風流信璧人雕扇障塵

通體雪蟬衫散麝滿堂春勝朝末葉酣歌舞眞珠房暎丹
霞舉門前朱網盡龕鬢鏡裏雲冠獨軒翥梳到陂陁不自
持念家山破破瓜時極天烽火煊花燭沸地金鞦叶竹絲
旂翻五色龍無影教坊漸漸消清冷繡幕初迎紫乙歸紅
牋又報黃鸝請依然人面似桃花花下翩翩捉鳳車祇覺
王孫寒寶玦未聞商女怨琵琶客星况復來如雨慧心巧
舌矜嬰武紅錦纏頭買笑翼黃金撒手酣歌舞就中風月
數泉湘爭采桐花飼鳳皇得意一爲池上客消魂雙宿葉
邊香斜簪鞞髻偏愁極儂足傾城汝傾國果然天上走雷
聲纔得簾前來月色曲曲回腸訴鳳娥分明香海有風波
秋心都上雙眉角春夢眞成一刹那蠟珠化淚和鉛瀉小

鳳辭樓先已嫁阿謂小不如綵翼覓雙飛何苦綠毛傷倒挂
孤館挑燈正寂寥酒醒寒盡怕春宵爲君辛苦題凡鳥別
有芳馨託楚騷

張貞孝哀辭

女名泰莖字仲仙貴陽人字同邑唐幼淇辛丑
夏幼淇隨張觀察勦匪粵西觸瘴歿女時十六
乃毀妝守志於家事大父及父母以孝聞尤慷
慨赴義舉癸丑二月卒年二十八其兄玉麟哀
之私諡曰貞孝

巖巖白石生彼黔水不老而死吁嗟嬰兒子解一女氏張字
於唐婿從軍何慨慷誓清猷歌鴛鴦解二歲辛丑瘴鬼哭

婿乃歿於羅斛吁嗟女年方十六吁嗟乃爲柏舟續解三女

有大父有父有母奉侍維謹湯藥甘旨縞素承歡心苦矣

解四拔我釵珥飾可以卹一鄉罄我鍼黹金可以寧一方此

奇女子非尋常解五貞木萎孝烏泣年二十八乃卒吁嗟黔

水長嗚咽解六

答顏指微三十韻

北土初見花西山尙歛黛濃寒戀敝裘噫氣散虛籟故人
來素書賤子觸奇嘅上言芳草思下言恤緯愛籥揣盲何
知絃音君自會魚龍一朝變海波炫萬態鸞閣滄衆咻麟
郊闕羣吠仙客競集羽美人爭弄睽啁雀愁空倉呼盧驩
博筮天狼芒亘霄胡馬氛入塞闐闐生悲風河漢警妖孛

削足履莫適傷指劍曷淬萬牛首乃迴六蠲飛轉退懲羹
而吹薺勿藥以起廢天象固自昭我意獨相悖方今嬰始
孩譬若病垂瘵東瀛摘火棗西溟拾玳瑁美矣善未盡時
乎來不再涇渭務分流雷雨宜竝逮廬山露面目明河洗
肝肺表端影必正鍼定行無碍杵杓其解懸板屋亦敵愾
安知躡崑崙不足脾世界奈何賦蒙戎况復刺襪襪兒戲
圖褒衣芥濫錫華珮持筮驅道塵擘膠治河穢龍象力且
疲馬牛風益背蠹蠹蝨門穴逐逐鼠懷袋憂天人固愚陟
邱女安在我歌既孔哀衆醉方未艾

烈婦劉左氏哀辭

烈婦左氏名德秉皖之廬江人適江寧劉世岐

爲室曾畢業粹敏女學世岐病歿於滬婦扶櫬
將歸如皋至唐家閘夜雨自縊於旅館帳中

治父山池鑄雌劍左家嬌女君不見解一年二十作新婦未

百日哭舅姑夫哀痛絕咯血且痛解二隨夫歸江寧王姑大

喜曰粹且敏宜爲女學子解三婦學成夫病成夫就醫於滬

婦侍不去夫不得生婦寧獨生解四樵車遙遙靈風蕭蕭婦

扶且泣言旋如皋解五唐家閘雨如淚帳中匹帛婦成義解六

雌劍啼雄劍躍治父山頭池水涸月黑雙雙飛鸞鶯解七

言樂社觀清親貴演劇感賦

鳳子龍孫舊弄臣當時媚佛雜伶人可憐璧月瓊花夜重
現金枝玉葉身

猶見當腰垂寶玦不聞咽淚訴銅琶座中別有龜年在默
默回腸數落花

中冷詩鈔辛編

舒州集

借馬寄翁顏指微遊迎江寺

丹徒葉玉森蒞漁

步出東城卽江水精藍尙惜逼喧塵硬黃貝葉排瓔珞
懸貝葉十一片書梵文四 枯墨龍梅奮爪鱗
分律橫行宛轉若瓔珞 枯墨龍梅奮爪鱗
畫墨梅屏四幅 遠鼎片時薰佛氣橫簪一夢汨天真寸心到
此歸平淡不上浮圖苦趁人

借章寄舟遊大觀亭

我來已覺春風老時見杜鵑飛夕陽片石有靈萬歌哭一
碑沒字幾滄桑亂生碧草纏棋劫微笑青山擁劍光
開眼欲觀吾倦矣危亭默默共蒼茫
駐時方兵

謁余忠宣公墓

唐兀氏奇男子色目家兒乃有此入爲刑部官雪冤五百
獄出屯灤山田得糧三萬斛觥觥書生兵乃爛一揮手破
貓豸蠻小姑山下風雲惡舒州城外風雷薄登陴慷慨公
誓師羣賊如毛齊錯愕飛樓忽起飄紅旌火鴉四散燒滿
城揮戈巷戰戟指罵睢陽已矣江淮傾一十八人名不滅
一千餘民魄何烈全家碧血化寒泉至今智井標風節吁
嗟乎褚不華危太樸一死一生判榮辱千秋萬歲皖山青
公不來兮杜鵑哭

與素人登天柱閣

劫火輪中此孤閣故應狂擁大山名二龍不語羣峰俯九

野方危一柱擎看倦眼都隨佛閉坐來心已與雲平更邀
太白遊天姥又恐今宵幻夢生

題陳少鹿畫孤松二首

珠髯婀娜一雌龍鱗爪居然眼底逢獨立蒼茫看雲氣不
知何處最高峰

畢宏韋偃今安在合讓先生豎指頭我欲黃山探雲海借
君一筆狀千虬

夜雨

炎威爾何物一雨便長驅夜靜繁喧起秋生熱惱無
窗蜥蜴驚屐草螻蛄料得田夫笑嘉禾萬頃蘇

小園雨後與雲石聯句

一雨洗千塵漁濕綠露深窈疲禽喧亞枝石潛蝶出叢篠
豆葉方纏籬漁榴花猶綻杪池滿沒鈞碣石石窪注殘潦
行歌會蛙鼓漁幻想擁翠葆入亭憩幽懷石遠徑巡靜瞭
沸耳感蝸蟾漁繭足惜驥裏永矢傳巖霖石隱惕東山艸
涼颺起天末漁萬里浮霾埽石

雨後塘水盛漲自牆穴入注溝作流泉聲與雲石

聯句

夜靜衆籟絕石澹月沉虛堂忽聞泠泠聲漁彷彿笙與簧
又似憂珮玉石僊袂來風廊呼鐙起幽尋漁乃在苔屨旁
流泉幻眼底石閃鑠生銀光移烏窮源頭漁暗穴通芳塘
梅雨一以漲石蛇竄侵我牆涓涓不爲塞漁坏土艱隄防

世局多漏卮石念此增感傷羲皇那可夢漁叩枕呼媧皇

送寄舟之任黟縣

相逢一笑皖江沱舌底瀾翻卷大河咒虎海隅曾說法君
任崇明法種花山縣又聞歌長才世定知雛鳳治理吾能
喻橐馳太息先鞭君去也幾回負手繞南柯

楊弢俠疊韻挽同舍趙韻丞余仍疊和二章

曾見菁莪始闢萊年年蓉水伴鷗來文光高耿推名宿酒
氣微呵發大雷冰語相思空幻夢韻丞會以夢仙遊一
唱有餘哀韻丞別南菁講舍不飛目送羣飛去未解天何
阨此才

金臺久已圯榛萊何苦長門賣賦來名士巾都成畫餅美人車尚戀輕雷靡蕪山上曾歌怨庚戌在都韻承會楊柳江南更寫哀民國初年開韻承心就浦口工程局事血到頭知嘔盡劇憐有子不能才

自安慶至舒城勘災紀行十四首

四月墜塵網局促居下吏奉役事清遊有若鳥傳翼既眇龍山鬢復拊龍山臂爰下分水嶺崎嶇安可避亂石間流泉詰屈苦迂滯嘉木漸葱蘢秋蟬聞嘒嘒枯禾已剪刈新葉細如蕙時見紅蓼花緣塍趁姿媚與狹蔽無簾驕陽烘膝際如坐蒸籠中沸沸騰蒸氣俯視肩輿人汗流方浹背苦樂乃霄壤心冷驚且媿烏乎平等難大悲參佛意

行行向練潭蹀躞湖之湄招招得一舟聊以張水嬉雙輿橫舟腹彷彿魚生鬣八尺紅布帆豔絕浮明漪欸乃和鳴榔吾亦歌吾詩洗耳緬清泠照鬢思清溪老此烟波鄉惟有鷗鳧鷺夕陽妝晚山娟娟初掃眉密綠藏人家知爲隱者棲徘徊十五里雲水相低迷陟岸入窮市乃覺天地非蛟龍眠蹠涔所樂在尺水騏驥服鹽車其志仍千里胸中有天地陋室信云美得之抵大烹腥穢陳六筮有榻足安夢夢境太奇詭初若歸里門白髮見兒喜忽似入戰雲西方見眼底又聞萬哀鴻嗷嗷鳴澤沚憂樂叢一宵吾夢亦勞止借枕笑盧生化蝶悟莊子更欲華胥遊目覩大同軌夢破忽披衣鷄鳴猶未已

五里橫山鋪十里鴨子湖蛟水卷橋飛汎汎盆爲桴港汊
何紛歧我友窮卽須水深沒踝膝跋涉艱車徒十里竹城
嘴薄粥餐一盂土人爲我言北鄉禾已枯益之以山洪圩
潰百丈餘縣官昨勘災過此停輕車復渡鮑家橋宛若長
虹舒道旁烏柏葉先霜紅且腴木棉垂雪花蠶繭疑扶疏
側睨桐城山疊翠相縈紆烟景不能繪胸有流民圖
桐城古文藪今乃占訟凶士林田舍兒刀筆爭英雄劉侯
慰實賢宰明鏡耿在胸每當叢脞時應變能從容辛亥俶
擾秋捍城維侯功剛柔相互用玩賊如兒童芭生我同年
持法秉至公東流與繁昌口碑猶穹窿治盜卓有聲漢吏
頗復同今爲轅下駒終非池中龍入署暢言笑續續談災

洪北鄉與西鄉水旱重以風封姨亦可怖屋瓦羣飛空邀
我視庭院吹拔雙梧桐烏乎天不仁人力將毋窮

言出城東門山路淨可愛流泉繞山麓裊裊東銀帶旣戾
呂亭驛村警木犀戴隱隱頽垣中一樹香旛夢回憶吳門
遊愚園結秋會碎金篩滿衣觴詠至一再故人翔天衢我
獨逐塵塏默默對孤芳觸目增感喟嗟峨白沙嶺石齒露
鱗齟鳥道及蠶叢險曲同一概躡足陟其脊雲樹獻萬態
環顧桐城山平淡毋乃太嶺下一村落蒼松映清瀨何必
武陵源微聞鷄犬吠

風輿趁曉涼山鷄啼喔喔犖確行徑微一步一却曲澗水
鳴琤琮羣兒嬉濯足雪白雙肥鵝掌紅閒躑躅小關泉水

清飽飲抵甘谷五里至山鋪一炬築新屋既抵梅心驛遠
山帶蒼綠飛蝗忽蔽天其羽何肅肅田婦竿繫裙栗陸事
驅逐但聞聲嗶嗶其音慘以迫乃渡七里河穢氣鼻時觸
田廬半漂沒老嫗抱柱哭風茅挂喬柯泥葉滿高木想見
水來時洶洶一丈足舒城當其衝山國乃澤國
龍舒漢封邑羹頡功無侔三堰與十陂水利能肇脩接踵
得良宰千載同歌謳至今有祠宇俎豆崇三劉膺膺魚稻
鄉曾無旱澇愁何圖禍薦臻虐魅兼洪流舒民且無生那
復思有秋竭來弔流民我心多煩憂海水正羣飛謬臺難
更籌賦稅入不敷仰屋徒歔嗟災侵况迭告竭澤將何求
此邦多大紳見義宜勇謀忍視吾民魚毋作兒孫牛請爲

鄭監門用慰劉賢侯

甫吉

驅車出西城蕩析已在目沄沄乾沙河汙流尙溇蓄暴露
見遺棺欹斜餘斷木荒荒周瑜城高墩緬芳躅沈沈七門
堰崩橋壓清淥行行至梅河受災云極酷田廬安足問淹
斃滿三百悽惻不能寐中宵聞野哭晨興父老來欲語聲
斷續云當咸豐年罹禍劇慘毒甲子方一週月日僅隔宿
咸豐七年七月十七日舒城大水本
年則陰歷七月十八日大劫竟循環老淚落盈躬
導予視災區兩言寫已足一家無一人一灣無一屋嗚咽
作何語梅山亦翼顧

山行路透迤濃寒欺蔽袍瑟縮笋輿中乃至五板橋晚禾
已偃仆蜀黍猶天翹鬱鬱曾家祠衆綠相圍包翠嶂拱疊

屏虬松喧怒濤十里三石寺密竹環蕭蕭下有流泉聲疑
在湘與瀟斗山復橫前宛轉捫其腰崩崖懸欲飛過之魂
爲搖渡河入曉天曠黑山犬嗥鄉董雜沓來溫語爭慰勞
爲我話水源窮另西山高蠹突及二祖石破騰潛蛟既下
黃絲潭盛氣不可撓復走巴洋河疾雨隨驚鷗中梅及九
井有若瓜蔓抄其勢已破竹直薄城乃漂歎歎重歎歎浩
劫安可逃
寒雲滿山髻濕雨吹我衣回車攬煙景宛若逢舊知摩頂
以放踵山靈容狎嬉既覽米家圖載誦輞川詩赤足牛背
兒小笠如覆箕又見田中婦披蓑扶一犁偃仄入叢綠滑
滑禽呼泥申之以滂沱輿覆不忍誹我僕既云痛我役亦

孔疲山深日易暮道阻路恐歧巴洋不可及且返梅河漪
哀哉漂流人不死翻苦飢風雨重飄搖窮鳥無棲枝佛陁
矢普濟堯舜病博施下車將曷慰涕泗雙交頤
曉雨仍纏綿輿入行更苦永安與永成雙圩化頽堵冲削
挺殘脊凍蛟狀艱阻褰裳宛轉前舉步難自主漸近下平
灘泥淤復阻阻河干大竹筏如笏不用櫓既渡誕登岸慘
狀已可觀巴洋舊名鎮塵市頗楚楚傷哉大水後百戶餘
三五高柳橫堤臥云是出蛟所屹屹龍王祠毒波不敢侮
遺黎號且呼我淚亦如雨乃越破竹嶺丹砂疑可糞復至
鮑家岡赤日漸微吐噪鵲飛滿枝曝陽刷毛羽遙遙望城
闕百雉尙未補歸來坐且嘆慘影入肺腑安得挽狂瀾吳

天降神禹

既歷西南鄉我行向東北風雨來無端荒村那可息八里
至涼亭微微生霽色東郊極清曠平溪淨如拭積潦瑩稻
畦農夫撈且戚緣河入桃溪聊此戢征翼于時日未哺入
室已全黑龍衣敗盡穿蝸牛小且仄惡臭不可邇屎溺道
莫測我聞蜀諸葛草廬隱良得又聞唐杜陵茅屋破不葺
南陽與蜀江林泉本佳適入此五濁界廻翔殊太窄回念
流亡人天地方幕席
攬輿河南堤潰口一何巨漠漠水田中拳立見白鷺更攀
龍王圩埂滑上無路輿夫手搯泥蹒跚以代步圩心塍已
沒溇沱足且迥危輿乃倒行退飛鷁轉悟溯河暨新廠復

過馬蹟渡鵝羣相歡迎羽衣歌且翥曲達台章圩水村幻
奇趣風柳搖清波田疇不知處航埠乃大鎮六圩幸完固
晚至千人橋橋下水猶怒棲身破屋中卑濕重垢汗越宿
賦遄歸途行淚時注偃蹇田中禾青芽茁同數四方吾已
覽慘境隨所遇向天乞仁漿苦雨尙霖霖

山行雜詩

深山大澤龍蛇窟此語傳疑已足驚祇惜清泉流石上奔
波一出禍蒼生
不種桑麻不種瓜山田不比水田窪木棉也解妝秋色淺
紫微黃淡白花
桐棺縛藁厝巖阿雨慘風悽奈若何太息青囊書誤汝空

山鬼哭至今多
松茶密密礙雲還
姑射仙人門髻鬢
若爲桐舒判山色
桐山青不及舒山
炊煙裊裊化輕曇
茆屋山腰嵌兩三
還向秋林認紅葉
是楓是柏是榲楠
四顧蒼茫起暮煙
層巒如墨抱雲眠
只因貪看青山色
月黑燈昏入曉天

名錄

廬江雜詠五首

五嶺高源古濫觴
廬江一脈共錢塘
更無人識三天子
莫向清流問故鄣
擲杯閣圯想玄風
移得淞江魏殿中
誰分鱸魚酬鳩酒
阿

瞞到底不英雄

陵亭已矣賸斜暉
此地曾禽鐵杖歸
還憶繡衣黃氣事
樹神祠下鯉魚飛

郎住西邊冷水關
妾家只在暖塘間
紅蠶作繭情絲苦
門外青青上箔山

箇儂丫髻傍城西
羞見鴛鴦浴繡溪
一自文明河上住
朝暮暮舞銅鞮

爲蔚公題桃花雙影與白中磊聯句

明湖之月魚兒白
西湖之水鸚哥綠
湖上無人按竹枝
漁春風齊唱桃花曲
花枝桃葉門清妍
不是同根也並憐
輕鳳飛鸞雙窈窕
磊素娥青女兩嬋娟
東坡居士香山老風

流走徧長安道未遇朝雲伴綺禪漁解惜飛飛吟好好紅
牙拍板紫檀槽眼底鶯花總寂寥不信燕脂空北地磊偶
因金粉問南朝天津橋上鶻啼夕暫遣清愁訪油壁卅六
鴛鴦七二沽漁中有花神編玉籍花神原是自由神藥闕
驚逢謫降身燕尾平分雲髮膩磊鳳頭初放繡鞵春自言
家住明湖淡盈盈十五春愁始豔質難禁宋玉窺漁癡情
拚作羅蘭死鈿約誰知賦子虛明珠宛轉玉盤盃牽絲何
苦勞鸚母磊覓粟翻教逐雁奴相依月姊芳京甸又值神
州淪赤縣王孫尙泣青珊瑚漁楊花敢怨東風賤嗚咽低
鬟不自持紅蕤密語兩心知叮嚀海水爲盟夜磊惆悵河
梁惜別時金陵重醉吳姬酒六朝劫後餘疏柳一曲桃花

扇底歌漁莫愁真箇無愁否桃花扇底夕陽紅門巷依稀
繫玉驄商女未銷瓊樹恨磊美人猶有麗華風無端又惹
情絲冑北勝南強商一遍茉莉何嘗讓牡丹漁玉環也合
憐飛燕西子湖邊舊苧蘿浣花溪上小風波生涯似夢哀
神女磊薄命如雲墮愛河怕談青島天魔舞小住青溪羞
白紵寶鼎添香泥說詩漁畫樓欹鬢邀聽雨恰好秦淮月
子圓相携同上木蘭船輕衫團扇秋如水磊玉臂雲鬢露
滿天西施願逐鴟夷舸淞水千花迎婀娜凌虛臺迴共遊
仙漁極樂園深同證果別後思量是夢中娉婷雙影可憐
蟲入懷一握疑明月磊盪氣千回到曉鐘簪花小字題裙
角碧海滄桑感淪落牧之十載懺清狂漁謝傅中年盛哀

樂哀樂清狂總是癡桃花人面酷相思玲瓏骰子雙紅豆
磊纔寫南枝又北枝漁

曩余宦淮南往來江上登北固諸峯慨然曰大江東去浪
淘盡千古人物矣雖然英武雄傑不可見意必有文章之
伯挺生其間鍾毓霸才其理一也久之聞有鐵甕三子者
曰丁闇公曰吳眉孫曰葉蒞漁顧皆不常居里閭無緣締
交心竊憾焉國變後息影淞濱從事法校乃獨識蒞漁傾
蓋把臂如平生歡暇輒爲建除體詩鐘聲鏗鏗與歇浦潮
相應答也其明年余走皖江蒞漁亦試得縣尹次皖旅居
密邇兩人者無一日不相見見則門尖叉恒至達旦同舍
或苦其煩而吾兩人興益豪談益肆不知天壤更有何樂
也旣而蒞漁司權歷陽余亦倦游返滬雖尺一之書旬必
累達第求如疇昔之樂不復得矣蒞漁乃郵其積稿屬余

甄選且要之以務嚴務刻余惟選詩難選蒞漁詩尤難在
 余則更難他人之詩喜標宗派應劉陶謝李杜韋孟蘇陸
 諸家涉籓籬者以門戶爲去留往往然也蒞漁則導源風
 騷胎息漢魏沈浸六朝唐宋奄有衆長不名一格取舍之
 間未易軒輊矣矧余夙嗜其詩而謂引繩批根之盡當乎
 獨念比歲以來余與蒞漁交最密酬唱最勤知其肆力古
 人甘苦淺深亦最切重違雅意芟存八編都爲中洽詩鈔
 付之排比且任校勘固知遺珠多矣然蒞漁健爲詩者也
 他日一官一集著作等身續當壽諸梨棗茲特其前導焉
 耳雖嚴且刻庸何傷乙卯歲暮通州白曾然

勘誤表

編序

乙丁

戊

己

葉二六九三六四八一九二二三

行

一七 一六 二二 二一 一五 二 一〇 一五 二 一六 二一 一四 一

誤

周爰 團羣 羣紫 毀毀 荻荳 叨埠 與予 碎匄 我惜 乃精 風過

正

周爰 團羣 羣紫 殷殷 荻荳 叨埠 予與 碎匄 我借 其精 風遠

辛 庚

七 四 八 五 四 三 一 一 八 八 七 六 六 六

四 九 二 八 七 八 〇 八 八 五 九 〇 〇 一 六

輿堂入 六蠲 日本設 垂 已 千 輪 金 母 星 人 法 盧 殘 絕 穹 荒 辨 漢 上 風 還 全 璫

輿堂人 六鷓 日本訓 已 垂 千 姿 金 母 仙 人 佉 盧 殊 絕 窮 荒 辨 漢 土 風 還 金 璫

88

溫州府 ② 志 卷 之 八